

UMUNTU UKUBUTUKA UKUFUMA

KU CINSO CAKWA SHIKULU

 Natukontamike imitwe yesu. Mwe Lesa watemwikwa, tuli abansansa muno cungulo kasuba pali iyi nshita mwatupela iya kulongana capamo nakabili. Kabili imwe Mweka, Shikulu, namwishiba ifyo imitima yesu ilekabila palwa ino nshita ukuti lintu twaiminina ku cinso ca bantu Benu nakabili pano, kabili nokuleta iyi Mbila iyo ifwe tulemona ukuba iikankala nganshi kabilo ilefwaikwa nganshi muli ino nshita. Imwe namutupela ishi nshiku ishinono nomba, kabili twapepa, Lesa mweba temwikwa, ukuti ukuboko Kwenu luse kwalaba pali ifwe, kukututungulula no kutusontelela. Kabili tupeni ifyo fintu ifyo tulekabila, Shikulu, pantu imitima yesu ilekabila ukwishiba Imwe bwino.

² Tulemona ukusombola kukalamba mwibala, ishabuta, ishapy, kabili nokwishiba ingano shili ishatayanishiwa pa nshita iikalamba iya kupula. Mwe Lesa watemwikwa, twapepa ukutila Mwalafumya ifipaapa ifili pali ifwe, lekeni tube Mukubapo kwa Mwana nomba, muli ishi nshiku ishinono ishalakonkapo, nokuba abapya aba mu Bufumu bwakwa Lesa.

³ Paaleni ulwimbo lonse ulwalaimbwa. Paaleni ipopo lyonse, kabili mwasuke na onse uwalapepelwako, Shikulu. Pususheni bonse abaluba. Iteni bonse ukubwela ku ng'anda iyakwa Lesa wa mweo, kabili nakwi senge, bonse abo ababwelela kunuma.

⁴ Twapepa, mwe Lesa, ukutila Imwe mwalaundapa umuntu onse umulwele uwishile muno mu cikulwa cesu. Cifilikisheni ico, Shikulu. Peba naangu umo uwanaka pakati kesu panuma yakulongana uku.

⁵ Kabili, mwe Lesa, nomba palwesu, ifwe fwebalande muli ino nshita ukuba i Chalichi, ica-Baitwa, nabonse abo abaitwa mwi sonde abo abaisa ukufuma mu Babylonii kabili ukuba abakumako kuli ili senge lyawama muli buno bushiku bwa kulekelesha, twapepa, mwe Lesa, ukutila Mwalapala imitima yesu mu musango waba ifyo. Tuli nensala icine cine, Shikulu, kabili abataluka kufintu ifye sonde fyonse, filya ifyo twaishiba. Shikulu, natubika lubali conse icafina ico icitucusha bwangu, kabili nomba lekeni tubutuke ulu ulubilo no kutekanya, ulo ulwabikwa kuli ifwe. Fikilisheni ico, Taata. Kabili lekeni tube abaisulamo ukucila, abakosa ukucila, abena Kristu abawama, pampela ya kuno kulongana, ukucila pafyo twaciba lintu twacingila. Lekeni Lesa apokelele ubukata bonse, pantu twaipusha ico mwi Shina lyakwa Yesu. Ameni.

⁶ Ndetontokanya iyi ni nshita iikalamba, munshita ino iyabushiku, iyo Nalolelapo pa nshita iitali. Ubushiku bumbi Naleeba umukashi wandi, Natile, “Ndomfwa sana umwenso, ilyo ndelolela ukuya ku kwi hema.” Ndomfwafye... Nalikwata ifibusa fimbì, ifyo fine, Nalikwata, ukushinguluka isonde lyonse, lelo palibapo icintu cimo pali lino i hema.

Nafumishiwe muli ulu lukungu pano, lintu Lesa ampele umweo pano pe sonde; kabilo Ndetunganya, nga cakutila Ena akokola ukwisa, Ndi nokushikwa pano pene pancende imo. Lintu Ena akesa, Ali nokunsanga pano pa ncende imo.

⁷ Lelo, cilemoneka kwati, palipo icintu cimo, lintu Natendeka ukutontonkanya palwa Jeffersonville. Ubushiku bumbi Naumfwile ukuba inkumba bulili; Nalandile kumukashi wandi, Natile, “Ndefuluka ku ng’anda, kabilo Nshishibe ico Ndefulukila ku ng’anda, kano nga cakutilafye nibalya abantu balempepelako.” Natile, “Ukuba, Ndi no... Icintufye cimo ico Njishibe ukucita kubwelelamo nokuya kwata inshiku shinono ishakulongana, mwamona nga tatwinga kwata icintu cimo ukufuma kuli Shikulu, limbi Ena alefwaya ifwe ukwishiba ifintu fimo.”

Kabilo nesambililo ilikalamba, ilikankala tukwete kuntanshi yesu nomba lili *Icupo No Kulekana*. Kabilo nga cakutila kuli ilipusho, kufwile kwaba ubwasuko. Teti kube ilipusho kano ninshi kuli ubwasuko. Temulandu nefyo cili, kufwile kwaba ubwasuko. Nga cakutila Shikulu atemwa, Ndefwaya nkeshe ukulanda pali ico, pa Mulungu ulucelo.

⁸ Kabilo nomba, ubushiku bwa mailo, Ndetontonkanya ukutila tulingile ukuba pano pa... Bushe lilya isukuulu balita shani? [Munyina Neville atila, “Parkview”—Kale.] Icikulwa cikalamba ica Parkview. Ni cinshi, mukwai? [“Parkview Junior High.”] Parkview Junior High. Ni banga abaishiba pa ncende pantu lyaba? Ukuba, Ndetunganya bali nokukwata ifyakumwenako kulya, bushe tabakacite, Munyina Neville? [“Ee.”] Lyaba... Lyena lyabafye mupepi napano kwati—kwati mupepi na mailoshi imo, kabilo kuli nokuba icaku mwenako. Imwe kukoneka, ukufuma mu musebo. Cena cikulwa icisuma, icakulwa ukuya pamuulu. Calikwata incende umo winga fungulula ukuboko kobe, nokulemba ifintu ifyo ulefwaya ukulemba, kabilo—kabilo—kabilo ne fintu. Kabilo Ndi uwu shininkisha ukutila mukomfwa bwino mulya ukucilapo ngefyo mwingaba, kulaba kwati kutitikana mu kulongana muno mwi—mwi hema. Kuli nokuba incende iikulu, iyakubikako ba motoka.

⁹ Nomba, Ndetontonkanya balikwata ifunde linono ilyo ifwe tufwile twalaya ukukonka, ilyo lyaba, ukukana isa mu ncende mpaka sikisi-sate. [Munyina Neville atila, “Tekufika palya pa faifi-sate; tekufika palya ilyo faifi-sate tailafika.”—Kale.] Kabilo

ni nshita nshi . . . [“Ifibi fisuka pa sikisi-sate.”] Nincetekela lyena litontonksnyo ilisuma kuli ifwe ukuba palya pa sikisi-sate.

Nomba, bena balikwata icikulwa icikalamba cimbi pano muno mu musumba umo umwikala abantu amakana mutanda. Nga cakutila twaba abantu abasuma pali kuno kulongana, bena limbi kuti batupela cilya cimo ku nshita yaku ntanshi pakulongana ukukalamba, limbi muinshita yakuntanshi muno lusuba lintu Nkabwela ukufuma mu fyalo fya kutali.

¹⁰ Kibili eico Ndetontonkanya kuti twaikala ukufika pa . . . Nibanga abo twinge kalika mulya? [Munyina Neville atila, “Kuti twaikalika nalimo amakana yane.”—Kale.] Amakana yane. Eico, mwamona, tuli nokukwata incende iikulu. Takwakabe ukubutukila. Kibili eico mukese pa sikisi-sate. Kibili nomba umuntu onse kuti aisa pa nshita iyalinga, abantu bonse capamo, kibili Ndi uwashininkisha muli—muli nokukwata ukwikala ukusuma. Kibili cena cakulwa ukuya pamuulu kwati nge *fyo*, kibili—kibili ne ncende pano apo imwe mwingalembela amashiwi mulefwaya ukulemba, nefyaba ngefyo. Kibili ico cikatampa, nga Shikulu atemwa . . .

¹¹ Ndetontonkanya nomba, mu nshita ino iyabushiku, buno ukuba ubushiku bwapali Citatu ubwa kulongana kwa mapepo, natukwata . . . Incende ilifye mupepi no kwisula, eico Natontonkanya ukutila limbi kuti twatampa mailo ubushiku. Twasonkele mwisubilo lyakuti limbi, nga twaba abalinga ukucilapo pano, kuti twaya kulya. Lelo Nincetekela cena . . . kuti caba icisuma ukuya pamuulu, bushe tauletontonkanya ifyo, Munyina Neville, ukuya pamuulu mailo ubushiku? Kibili nibanga abaletontonkanya ukutila ilyo lili nokuba itontonkanyo ilisuma? Kibili nomba muli nokukwata incende i—iikulu. Cena—cena calisonkelwa kale; cena cali lipilwa kuba bwananyina bamu muno mu chalichi. Cena catusendele ama dolla amakumi yasano pa bushiku bumo, ico icili nganshi, nganshi . . . Kuti Natemwa ukukwata cilya ukuli konse, kuti baikalamo abengi muli ulya musango pama dolla amakumi yasano pa bushiku bumo, icikulwa icipiya, apakwiminina apasuma. Kibili, lelo tuli ba . . .

¹² Ifyo fine, tuli nokupela umusangulo, Ndesubila. Kibili tatulefwaya balya abaume ku kulipila cilya abene beka; tukalipila pa . . . tukaba bweseha. Lintu tukakwata ifya kulipila fyesu ne fintu, ukuba, nomba, ifyo fine, kuti twaleka ukusenda umusangulo. Tatu . . .

¹³ Nga kuliko abeni pakati kesu, twalipanga lilya ukuba ifunde, ukukana lomba lomba, ukulomba, ukusunka abantu pa ndalam. Tulapishamo imbale iya kusangwilapo, ico cabafye . . . Ico cabafye imicitile ya bukapepa. Nalicesha, inshita ishingi, no kukana pishamo imbale iya ku sangwilapo, nakalya, lelo tacibomba. Mwamona? Pantu, ukupela caba fye iciputulwa ca

bukapepa bwesu. Cena caba iciputulwa ca mulimo wesu. Te mulandu nangu kali kobiili, nangu conse ico cingaba, nangu penni, cena conse cilifye bwino. . .

¹⁴ Eico muleibukisha, Yesu amwene mukamfwilwa alepita, ubushiku bumo, uko abantu abakankala balebikamo ifingi ifya fyuma fyabo umwakusangwila. Kibili noyu mukamfwilwa alipitile, nalimo nakalibumba akanono aka bana abansala abaleenda ku mbali yakwe, kibili apele fyonse ifyo akwete, ama penni yatatu. Kibili Yesu atile, "Nani uwapele ifingi?"

¹⁵ Nomba, nga cakutila epo Nali palya, nga Natile, "Wicite co, nkashi. Ifwe—ifwe, lolesha, ifwe twalikwata indalamu ishingi." Lelo Ena tatalile mukanya. Mwamona? Ali—Alishibe Alikwete icintu cimo icikalamba ku ntansi yakwe kumpela ya musebo. Eico, mwamona, nangu cibe fyo, alikwete ing'anda mu Bukata, uko kuntu aleya. Kibili Tatalile ukumulesha. Amulekele abikamo ama penni yakwe yatatu, pantu cena califye ni ena uwalefwaya ukucita ico. Kibili afwaile ukucita cilya; pamo nabana, kibili mukamfwilwa, kibili na ma pennifye yatatu aya kwikalilapo. Ena, ena alefwayafye ukucita cilya. Eico, mwamona, ilyo abantu balefwaya ukupela, mulingile mwabapela inshita iyakucita cilya.

¹⁶ Lelo Ndetontonkanya pali aba beminine, na bantu ukusosa, "Nibanani abalapela ama dolla amakumi yasano? Nibanani abalapela ama dolla amakumi yabil?" Ndetontonkanya ico calaba ku—ku mano yenu. Nde—Ndetontonkanya ukuti abantu balailuka ukuti cisenda indalamu ku—kukwata u—ukulongana. Kibili tekuti Mbalekelele ukuti bacite icintu ca musango uyo, ba maneja. Natile, "Inshita ilili yonse ilyo mulefwaya ukucita ico, lyena ninshi ninshita kuli ine ukubwelelamo kwi hema. Eico, tatulingile ukucita cilya." Lelo Nda—Ndatontonkanya ukuti tufwile ukupishamo imbale ya musangulo, pa—pakutila twinga kulenga kube ukulongana ukwapwililika ukwa bukapepa.

¹⁷ Kibili eico nalimo bali nokula bali nokula pishamo akabale akanono akamusangulo cila nshita ya bushiku, ukulanda icapala nga, "Ukuba, twalapela umusangulo nomba." Kibili bali nokulapishamo imbale ya musangulo, kibili iyo ili—ili nokuba impela yaico.

¹⁸ Kibili cila bushiku munshita ya bushiku, Shikulu nga atemwa, Ndetontonkanya Shikulu nabika pa mutima wandi i Mbila iyalinga nganshi iya Chalichi. Nali mu mapepo inshiku ishingi. Kibili Nshaye muli ico, pantu icintu icakupapusha icikalamba cali citika ubushiku ubwafumako ico icali icikalamba nganshi. Kibili Ndi uwafwaisha nganshi ukumweba pali cena. Kibili nomba, isambililo iline line, Ndemonia, ilyo abengi muli bema, Billy atile, ilyo bepusha, lyaba ni pa *Cupo No Kulekana*. Iyo, lyena likalamba—likalamba isambilisho, kibili Nsha—Nshaishibe nefya kulileta. Kibili Naliile pa

muulu no kupepelapo pali lyena, kibili Shikulu ankumenye. Kibili Ninjishiba ukutila Ine, ukupitila . . . Nshikwete, lelo Lesa nalipela kuli ine; Nindikwata nomba. Lesa nampela ubwasuko ubwa cine, mwamona, mwamona, kibili Ni—Ninjishiba ukutila ico e cine.

¹⁹ Kibili eico Nshilati njishibe bwino bwino, limbi, pa Mulungu kuti Naipusha ba nkashi ukukana sangwakofye mukulongana, palwabo, lelo Ine—Ine nshishibe. Cena cili nokuba ku banakashi abaupwa nga cakutila bena balefwaya ukwisa pamo nabalume babo. Muli—muli ifintu fimo ifikankala nganshi ifilingile ukusoswa, icine pali fyena, kibili no mulandu . . . Kibili eico tulefwaya ukucileta mukupwililika, ica EFYO ASOSA SHIKULU, nomba ninshi mwakwata cena. Imwe muli nokwishibafye nomba ico icabe i Cine. Kibili Ndecetekela Ena ukucite co.

²⁰ Kibili, nomba, Nali pano pa cikulwa cakulilamo ubushiku bumbi, nalelya, na—na Jerry kibili na bonsefye balefwaya imwe bonse. Batile, batile, “Ukuba, ifwe . . .” Bamo, umo pa balumendo aliminine, atile, uyu muntu atile, “Ndino nokuba bwino uno mulungu,” atile, “bali no kukwata . . . Nangu, iyi milungu ibili iikakonkapo.” Atile, “Bena bali nokukwata u—umusonkano kuno, uwa mupila wa basketball, nangu icintu cimbi.” Atile, nomba atile, “Branham ali pano, ali nokukwata umusonkano.” Atile, “Nkalisha abantu bonse.” Pa Ranch House, incende imo pa ncende ishaba kulya. Kibili bena bali . . . bali abasuma nganshi.

²¹ Kibili Ndemitotela bonse, pantu mucine bali lumbenye no kusosa ifisuma pali imwe.

²² Ba manager kulya ku Ranch House bali nkumenye ulucelo ulwa fumako. Nafikile nalimo pa two-sate, ukufuma ku Arizona. Kibili atile, “Ukuba, Munyina Branham,” atile, “Ning’umfwa ukutila uli no kukwata ukulongana na kumbi.” Atile, “Ninkwata ubwafwilisho na bumbi,” efyo asosele. Kibili atile, “Elyo Ndefwaya ukusosa icintu cimo, ukutila abo abantu abafuma kwisamba kulya,” atile, “bena mucine bantu abasuma.” Nomba, ico canengele ukumfwa bwino nganshi palwa imwe, mwamona.

Pantu, nangu cibefyo, Ng’umfwa ukuti imwe muli bana bandi, kibili Ine—Ine . . . nangu, abana, ntile. Eico kanshi Ine . . . Akana kemiminako imbushi, kibili tamuli mbushi. Muli bana bandi aba mpaanga. Caumfwika shani ico? Muli bana ba mpaanga abakwa Shikulu abo Anenga ukulisha. Kibili Ndesubila ukutila ico cikaba—cikaba . . . cilya Ali nokunenga ukucita cilya. Tuleya mukati ka bulendo.

²³ Kibili palwa *Cupo No Kulekana*, lyonse Nalefwaya ukulanda pali fyena ukutula lilya line Ifikakatikilo Cinelubali. Namwishiba, ifya nka—. . . Ifyankama fyonse fyali nokwishibikwa muli fyena ukwisula fyena, ukwisula

Ifikakatikilo Cinelubali, ifyankama fyonse muli Baibele. Kibili Ndetontonkanya nomba, ndeya ndekula, Nde—Ndetontonkanya Ine... Natontonkenye ukutila kuti cawamishapo Nafibika pa tepu, nangu icintu cimo calicitike kuli ine, elyo limbi i Chalichi kuti capapa, "Kuti lwapapa icali mu mano yakwe? Finshi ali no kusosa?" Kibili na yonse yalya amasambililo ayo aya moneka ukuba ayakosa nganshi; Ndetontonkanya, ukupitila mu... mubwafwilisho bwa kwa Shikulu, Ndinokwesha ukufileta kuli imwe. Kibili nomba—nomba nga cakutila icintu cimo cacitike, kibili nga cakutila Ndi nokuya kulya lintu Talaisa, imwe mu—mukafikwata mukafikwata mufyasungwa nomba.

²⁴ Ndetontonkanya natukwata ama buuku yamo ayapya ayafumine. Nimona Nkashi Vayle; Nshishibe nga cakutila dokota nga ali muno nangu iyo. Bushe ali muno, Nkashi Vayle? Nalimo limbi emo ali mukulongana. Nshilemumona. Lelo, oh, ee, kunuma kulya. Kibili Munyina Vayle ali lemba ibuuku, kibili lyaba lya... Natontonkenye, Ndecetekela bacilande lelo, yabili. Munyina Vayle, bushe ico cishinka, namukwata yabili muno nomba? Ama buuku yabili. Nomba, Nshishibe, Ine... Umusango Ndeumfwilamo, ukutila cila muntu ali nokukwata limo. Eico Ine... Nga cakuti imwe... Iyo e nshila Njishibilemo. Limbi kuti naba uwaluba pali ico.

²⁵ Kibili nomba *Inkuo Shama Chalichi Cine lubali shalipwishiwa* (Bushe ico nacilungama, Munyina Vayle?) kibili nomba balefumya. Kibili Ninjishiba ukutila kuti mwayakabilia ukuyakwata, pantu yaleyasuka amepusho yenu ayengi ayo mwakwata mu mitima yenu. Kibili nomba panuma ya ico, ukuba, tuli nokwesha ukukwata *Ifikakatikilo Cinelubali* ukwisulwa, na mwishiba, mwi buuku, pakutila cila muntu enga belenga mu musango bale—balefwaitamo, pakutila mwingofwikisha no kufisoma. Ndetontonkanya lintu lyena lyalembwa, nga cakuti lyena...

²⁶ Mukubalilapo, twasendele ukulifumya pali tepu, mu musango lyena lyalembelwemo nangu ukulandwa. Namwishiba, kuti washimikila imbila, cintu cimo, elyo kibili ukulembe ibuuku mu cintu cimbi. Mwamona, kwati limbi Nasosafyepe sambililo, ngefyo Ningasosa kuli imwe, kuti mwaumfwa, nga Natila, "Nomba, ulubuto lwa nsoka," mwamona.

Ukuba, nomba, kabelenga wa lilya ibuuku, nga cakutila imwe mwafunyamo ico, kuti asunguka, "Bushe ulubuto lwa nsoka nicinshi?" Mwamona? Kibili bena tekuti beshibe. Nga cakutila ico cacitike ukuya muncende kwati iyaba kwati Princeton nangu incende imbi kumo, kibili bena—bena kuti batontonkanya ukuti ifwe tatwali abantu ba amano.

Eico, Nabulile Munyina Vayle uwakuti angafwilisha neci kibili nokusungilila pe tontonkanyo limo line, no kulemba amashiwi bwino. Kibili mucine imilandile Yandi kuti ba...

Kuti yaba icankama kuli bena, ukushininkisha bwino. Eico . . . Munyina Vayle alishibisha nganshi pali ico, eico ena aba nga . . .

²⁷ Elyo kibili, muli ico, Ndetontokanya munyinefwe umusuma ali nokuleta ukunono ukwacilapo, munshila iyo, kibili atile ali no kulemba amabuku nayambi ayakwe umwine, ukufuma muli yena, kwati. Eico kanshi alembele limo ilitwa, Ndecetekela, *Kasesema uwa Mu Twentieth Century*, kibili nalimbi, *i Chalichi camu Laodekeya*, Ndecetekela, nangu icintu cimbi icaba ngefyo.

²⁸ Kibili Billy anjebele ukutila, lelo mu nshita ya bushiku, Nincetekela ukuti amakana ayengi aya yena nayafika ileelo; umuntu umo aciyaleta ukufuma ku Texas. Kibili eico, yena, yaleba pano. Kibili bale bilisha, Ndetontonksnya, ifyo yena. Ndetontonkanya yena yalilipilwa. Nshili uwa shininkisha. Kibili nge fyo yali, yakapelwa kuli imwe, mwamona, nayo, ubupefye. Kibili tulesubila muli nokusangalala muli yena. Kibili nga mukayomfwa bwino, mumuposhe Munyina Vayle kunuma kulya nokumweba umusango imwe muletotelamo pali ico. Nshilati mbelengepo, palwandi. Nga cakuti Nayabelenga, limbi kuti Napilibula amano yandi pali ico, Ndi nokwesha ukuyabelenga uyu mulungu nga nakwata inshita, Ndi nokubelenga.

²⁹ Nomba Ileelo ukuba pali Citatu pabushiku pakuba pali Citatu ubushiku, ukulongana kwesu kukesulwa mailo ubuhshiku. Lelo Ndetontonkanya, pakuba pano pakati kenu, Ine—Ine—Ine tekutifye nnikale pa ng'anda kibili—kibili ninjishiba ukutila bonse imwe mwali pano. Ine . . . Kwatifye, namwishiha, kwati nibamo balupwa wenu nga baisa, namwishiha, kibili imwe mwabutukila ukufika ku mpela ya musebo mukubakumanya, namwishiha. Kibili—kibili Ine—Ine nacitontonkanya ukuti Ningilefye ukwisa no—no kumisengela kuno ku Jeffersonville. Kibili eico uno mulungu wapwile Ine palwa . . .

Iyo, Njeleleniko, pena palipita kwati imilungu itatu, mfwile Nabwelela ku ng'anda. Nalifuminepo ukwesha uku . . . Nali mu kulongana ku Arizona kulya, kibili Nimbwela mukutusha. Kibili Naile pa bulendo mu kulunga, kibili Ine—Ine nalipokele ilyashi pa nkalamo yatekwa no buteko bwa Arizona. Nali ibutwishes mukati ka mitengo ama mailoshi amakumi yabili ukufwaya ukuipaya.

³⁰ Lelo nomba ukutontonkanya, nangu, cilya Nshatalile ukucitonkanya ilyo Nali umulumendo . . . Ukulangishafye ifyo ifi fintu ficitika, incende inono iyo Shikulu atupela kulya lubali, pa myeshi iyo twaikala kulya, kibili ne sukuulu lya bana.

Nali umulumendo umunono. Ndesubila Jimmy Poole ali muno ino nshita ya bushiku, limbi ba wishi bali muno, ba Jim mukalamba. Twaleyka kusukulu capamo, kibili Ndeibukisha

ukwikala palya, ngaka mulumendo kamo akamifwalile ishalondoloka, ne nsapato, insapato sha tennis ku molu, ne fikondo nafifumina kunse; naashime ipepala kuli umo, na pensulo kuli umbi.

³¹ Nalelemba imishikakulo. Kibili ba Misisi Woods, pano, bacilafwaya ine ukulanda cilya muno cungulo kasuba pali tepu, palwa Ford yandi iyakale, namwishiha, kibili yena—yena isuma. Nomba, atile, “Ukuba, imwe mulingile ukutuma ilya kuli ba Mista Ford.”

Natile, “Palibapo icine icikalamba, Ndecetekela,” pa cisekese ku ntanshi, kibili no kulakwesa ku numa, kibili na mapinda ya ma Chinese palwa ca kwensheshako ca kunuma. Lelo Ine... Caba—caba ni... Lelo lyonse Ndalandia ukuti, icintufye cimo ico Mfwile ukucita kupenda amatayala yane, kibili ukusunkanya ukwalinga aukutila yena ilile nokwingilamo muli yena. Natile, “Cena caliwama lintu Ine natampa ukunina ulupili nayena, kibili ukuyafye ileenda panono-panono, ndelanda ukuti, ‘Ndetontonkanya kuti Nacita,’ Ndetontokanya kuti Nacita, Ndetontonkanya kuti Nacita.’ Nomba tampa, ku lubali lumbi, iletila, ‘Naletontonkanya kuti Nacita, Naletontonkanya kuti Nacita.’”

Uyo e musango tuninikilamo ulu ulupili, kwati *Balebeshi baleya Kuntanshi*. Eico ifwe...

³² Nalikwete umushikakulo unono untu Nalembele, icintu cimo icapala ngefi. Kibili natile... Nomba, mutontokanye fye, Nalifye nemyaka yakufyalwa ikumi limo naibili. Kibili naliiminine palya, ubushiku bumbi, ukulalolesha pa mukonko pakati ka mpili palya; kibili natontonkenye, “Ilya inkalamo ikala muno mwine mu lucengo naloleshe pe windo,” pe kalashi lya pe window. Naletontonkanya pa kamushikakulo unono. Nabwelelemo ukuya ubula, icintu cimo kwati nge fi. Uku tontonkanyaafye umusango untu Lesa Lesa...

³³ Bushe mulecetekela Lesa aba mukusubwa konse? Lesa alalemba ulwimbo. Bushe mulecetekela Lesa aba mu nyimbo? Yesu efyo alanda. Asontelele ku numa kuli Davidi, “Bushe tamwaishiba ifyo Davidi alanda musha Malumbo? Mwalishiba, tatala...”

³⁴ Lolesheni pali kulya kwine ukutanikwa. Davidi aimbile lwena, mu Malumbo 22, “Lesa Wandi, Lesa Wandi, cinshi Mwandekesesha Ine? Amafupa Yandi yonse, yena yatonta pali Ine. Yapita mumaboko Yandi na mumakasa Yandi.” Namwishiha, kibili lulya lwali lwimbo. Amalumbo yena—yena lwimbo.

³⁵ Kibili muli uyu mushikakulo, imwe monenifye ifyo cena caishile fikilishiwa. Ukwikala palya, umunono umukalamba umwaice ukwikala palya nepepala lyakwashima, Natile:

Ine ndi uwankumba bulili nganshi, oh, pali kulya ukutali ukufuma ku southwest, Uko ifinshingwa fimonekela nganshi pa mulu walupili.

Kuti namona mumbwe wamu mpanga nabelamina muli fubefube uwabutulukila, Kuti naumfwa umumbulu wamumpanga ulelilila apo insansala shilelya.

Kabili palya pa muulu kuti Naumfwa inkalamo ileikankansha, Kulya ukutali mu Mpili sha Catalina ku mpela ya Arizona.

³⁶ Panuma ya myaka amakumi yane, ninshi Naikele palya pene pamuulu wa mukonko, ilya inkalamo yaleolesha pa cinsو candi.

O mwe Lesa, kuli Mpanga ukwabuka umumana umo kuncende imo, mwefibusu. Fyena filingile ukubako kulya. Mwamona? Kwabafye—kwabafye ukulanda apakalamba palwa ifyo. Fyonse ifi fintu tafyaba ifyakutunganyafyе; fyena fyaba... Fyena fyaba ifyacine. Fyaba ifituntulu. Ndi uwansansa ukuba pano munshita ino iyabushiku, ukuba pamo naba bantu abo Nde enekela ukwikala pamo nabena Kulya umuyayaya pamo, kulya ukushakabe nakabili ukulwala, nangu imfwa, nangu ukulekana. Kabili nokwenda takwakabe nangu cimo kuli ifwe lyena.

³⁷ Nomba, Ndetontonkanya ukulongana teti kube ukwapwililika ukwabulo ukubelenga i Cebo kabili nokukwata apanono...

Munyina Neville, Ine nacendafye ukwisa pano. lelo Billy acinjeba ukutila iwe ulefwaya ine nshimikile. Bushe ico cishinka, Munyina Neville? [Munyina Neville atila, “Ameni. Ee. Icine cine.”—Kale.] Ine limbi kuti kwaba ukunsenda ifyo fine, lelo Ine—Ine nacumfwafye ubusuma palwa ico.

Eico, nomba, imwe mwe bakwete inyimbo ne fintu, mumone Munyina Neville mwishibe lintu mwalaimbа, kibili nomba kuti mwacita ico, palya lubali. Kabili namukwatafyе ama mineti citika wa ora umo ukabalilapo ukwimba, kobili twingile mukushika muli ishi Mbila no kumona ifyo Shikulu alatucitila. Kabili Nincetekelafye...

³⁸ Ni—Nincetekela ukutila twalikwata Icine. Ndomfwa bwino pali ico. Ine nalicetekela ukutila ingano shaba mukupwililika lintu ifikapa fyafumako kuli shena. Imwe namwishiba. Kabili, mwamona, kibili kuti Napela ubulondoloshi ubunono pali cilya mailo mu nshita ya bushiku, mwamona, muli nokumona ifyo ifikapa fikafumako ku ngano. Lelo ingano shifwile shabapo mu Kubapo kwa Mwana, ukuti shipye. Kabili ici eco tubelele muno, cibusa, ikala mu Kubapo kwa Mwana mpaka ibumba lyesu ilinono ilya bantu pano, mpaka lyaba ilyapisha kuli Kristu,

mpaka shena shasanguka umukate pe tebulo Lyakwe. Ico eco Ndefwaya ine ukucita.

³⁹ Kibili nomba ilyo tatulapalama ku Cebo, panuma ya kupituluka mu mishikakulo, nefili ngefyo, ka tupepe nakabili. Nomba twalabula isambililo.

⁴⁰ Mwe Yesu watemwikwa, twafwilisheni munshita ino iyabushiku nomba, muli aya amashiwi ayanono, ilyo tulelolela pali Imwe. Kibili twapepa ukutila ukusenamina Kwenu noluse fyalaba pali ifwe, Shikulu. Kibili wamyeni imitima yesu; fumyenimo ifikapa fyonse, imyunga, na bacilasa, lekeni akasuba akapalwa akakwa Lesa kasanike pa Cebo cenu, Shikulu. Kibili lekeni tukwate ukulongana ukukalamba ukwaba ifyo mpaka peba nangu umuntu umo pakati kesu uushapusuka, bonse abana bali nokuba mu Bufumu bwakwa Lesa. Balya abashakwata ulubatisho lwa Mupashi, lekeni ba Lupokelele, Taata. Lekeni ifyankama fyonse ifyo tufwile ukwishesiba pali iyi nshita, Shikulu, fisokololwe kuli ifwe; Kibili twalamona bu pambilibili ubwakwa Lesa, pakutila ifwe twingeshiba ifya mibele isuma pakati kes nokucita, ukuiungamika palwesu nokuleta ifilundwa fya mibili yesu mukumfwila ku Cebo, ukuti ifwe twingeshiba ifyo tufwile ukwikala muli buno ubushiku pakupalamina kwakwisa kwakwa Shikulu Yesu.

⁴¹ Ilyo Ndebelenga i Cebo Cenu munshita ino iya bushiku, Shikulu, Ine limbi, muku sambililo kwandi ukunono, ningaba uwakubelenga mumashiwi yamo, kabili limbi ukukana landa bwino bwino amashiwi yambi. Lelo, Shikulu Lesa, Imwe mweka nimwe mwinggaleta ukufumya umutwe mulya. Nimwefye Mweka mwebengacita. Takuli—takuli inshila iyo umuntu enga citilamo ico; cena cili mumaboko Yenu, Shikulu. Eico peleni kuli ifwe, cila bushiku, ifyo fintu ifyafiswa mu Cebo Cenu, ukutila twingaba abena Kristu abasuma nokwikala umwabelia inshita tuleikalilamo, nge fyakumwenako fya bwina Kristu. Twalombela mwi Shina lyakwa Shikulu Yesu. Ameni.

⁴² Nomba, mwebengi imwe, muli ba Baibele yenu, Ndefwaya imwe mwisule mwi Buuku lyakwa Yona. Cena caba... Ifwe lyonse tulalanda apakalamba palwa kwa Yona ukuba uwaponene na fyonse fintu. Ine lyonse naba ku lubali lwakwa Yona. Ine nshacetekela ukutila Yona alibwelele kunuma. Ine—Ine nshacetekela ico. Nacetekela ukuti cenafye... Ifwe inshita shimo shimofye tulabomfyा ico, ukutila, “Ena ni Yona.” Lelo nga cakuit ifwe... Ine kale ninanda pali ico, munshila imbi, mukumyeba ifyo Ine natontonkenye pali, Yona, pafya citike.

*Nomba icebo cakuwa SHIKULU caishile kuli Yona
umwana wakwa Amitai, aciti,*

*Ima, kibili kabiye ku Nineve, ulya umusumba
ukalamba, kibili kashimikile palwa wena; pantu ububi
bwabo na bwisa ku cinsو candi.*

Lelo Yona aimine nokubutukila ku Tarshishi ukufuma mukubapo kwa kwa SHIKULU, kabili nokuya nokutentemukila ku Yoppa; kabili asangile ubwato buleya ku Tarshishi: eico alipile umutengo wauko, kabili aingile pansi muli bwena, ukuya nabena ku Tarshishi ukufuma mukubapo kwakwa SHIKULU.

⁴³ Bushe iyo te mpela yabulanda? *Umuntu Ukubutuka Ukufuma Ku Cinso Cakwa Shikulu*, kabili ili e sambilisho lyandi.

⁴⁴ Nomba, mukubalilapo tulefwaya ukutontonkanya pali ici. Yona ali... Umulandu, umulandu wine uukalamba, untu Ine nacetekela ukutila acitile ici cintu icikalamba pano, cali ni pamulandu wakutila Yona ali mu Yuda. Kabili ena ba mwipwishe ukuya ku musumba wa bena Fyalo, ukuya shimikila nokukalipila wena; ukutontonkanya ukutila ena tekuti bamupokelele. Pantu, abena Fyalo kuti batontonkanya ukuti, "Cinshi ico uyu umu Yuda akwete icakucita pamo naifwe?" Lelo, mulemona, icintu cimbi, ciletupela icintu cimbi icikalamba icakumona, ukutila Lesa te Lesa waba Yudafye, lelo Ena ni Lesa uwabena Fyalo. Ena ni Lesa wa bantu bonse.

⁴⁵ Asalifeye aba Yuda. Aba Yuda baleitwa abantu abasalwa bakwa Lesa. Basalilwe pa mulandu umo uukankala. Kabili noyu mulandu wali, ukubapela amalango, kabili balifililwe ukuyasunga. Kabili Alangishefye, ku bantu balya, ukuti amalango tekuti yasungwe, kabili ukutila Ena ali ni-ni-ni Lesa uwa bulungami. Kabili na malango yalefwaya ubulungami, lelo tamwali inkumbu mu malango, ku kupokolola umuntu. Mu malango tamwali ukulipilila ukukandwa, lelo casendele inkumbu ukulipilila kulyo kukandwa, nangu uko amalango yatutitikishe.

⁴⁶ Kabili Yona pano alitilwe ko, nge ci, ena ukuba umo kasesema umunono uwa mu Baibebe, ukuya kulya ku musumba.

Kabili tulesanga icilangililo icaifwe bonse. Bonsefye ifwe, lyonse tulabutuka ukufuma ku cintu cimo. Tulabutuka ku mafya. Tulabutuka ku milimo. Ifwe, bonsefye twalikumako ku kucita cilya. Ifwe, twaba, twaba abacilishapo ku kubutuka ukucila ukushipikisha no kucipokelela ici. Mwamona, twabafye... Ifwe—ifwe—ifwe tulaisanga fwebene tulebutuka.

Limo limo tulaisanga fwebene ukubutuka umulimo. Tatufwaya, tatufwaya ukubomba. Abantu bambo batontonkanya ukutila kuti bakwata ubwikalo ukwabulo kubomba. Lelo, Ndetontonkanya, Solomoni ewa sosele ukutila kuti twasanga pano ubwasuko, pa kumona akanyebole.

⁴⁷ Namwishiba, akanyebole akanono, balanjeba ukutila nga kalya (konse) akanyebole takalebomba no kulalafye, kalya akanyebole takesa mukulyako mu nshita ilya ya mpepo, nakalya. Eico, onse alingile u—ukubomba.

⁴⁸ Twalikwata ifintu ifingi ifyo tulingile ukucita, imilimo iingi sana iyo tulingile ukuloleshapo. Cila muntu alingile ukukwata ukulolekesha pa mulimo umo.

⁴⁹ Lintu mu—lintu mukesa mu—mukusala umukashi wenu, ku kuupa, nangu ukusalala umulume wenu, mu—mulingile ukukwata umulimo. Kibili nomba mulingile ukwibukisha... Limbi kuti mwakula ing'anda; ni ng'anda isuma nganshi. Elyo kibili, ibukisheni, ngo mwanakashi uwaupwa, mulingile ukutontonkanya pa mulimo uwa kukusha abana. Kibili mulingile ukutontonkanya pali filya ifyayemba, ifibumba ifyatelela fikakwata, ifiko ifya fisansafya minwe inono kuli fyena. Elyo mwalikwata umulimo wa kusambilisha abana benu. Mwalikwata umulimo uwakufwika nokulisha.

⁵⁰ Icili conse mulimo. Kibili cintu cayanguka sana, lintu imilimo yatulolesha, ukutaluka kuli yena. Kibili twasanga ukutila icupo mulimo, mu misango yonse.

⁵¹ Nangu, inshita ishingi, tusanga... Ici cintu cakosa ukusosa, lelo cishinka, ukutila bakashimikila, inshita ishingi, balakana umulimo wa kwiminina ne Cebo ica cine icakwa Lesa ilyo ba kumana Naco. Balakana ulyo mulimo. Ilyo Icine ica Cebo cakwa Lesa caletwa icinso necinso kuli ifwe fwe bantu, twalikwata... twaba abakatalukako mpaka ubwafwilisho bwa kulekelesha.

⁵² Napwisheshefye ukulanda ku mwipwa wandi kulya lubali. Ni Katolika, kibili ena... Kibili Nali mubatisha ulyo mulumendo, mwi Shina lya kwa Yesu Kristu, kuno imyaka iinono iyafumako, kibili atendeke ukwenda no mwanakashi umunono umo kibili aishileba Katolika. Kibili Naikatilile ukuboko kwa ba nyina lintu balefwa kuli ilye ncende. Batile kuli ine, amashiwi yakulekelesha, "Ulemusunga Melvin." Kibili ena alotafye ifiloti. Tekutifye... Cila, cila bushiku, umulungu uwapwile, alelota ifiloti. Atile, "Naliingile mu chalici mu mobe, Yama Bill, kibili waliiminine ku ntanshi uleshimikila. Nabutukile kuntanshi, ukutila ninga tendeka ukulapila. Nalishibwike." Atile, "Na—Naliluba."

Natile, "Melvin, taulekabila nobwilulo kuli ico. Incende yobe yaba kulya kwine wasontelwa ukuba." Ico cishinka. Mwamona?

⁵³ Lelo nga twaisa ku kulolekesha pa milimo, inshita shimo cisenda amaka na mano yesu yonse, ku kucita cilya. Nga taata, ku kulolekesha pa milimo, ku kulopola umwana obe no bwembya. Balya abana abanono, tamufwaya ukucita cilya. Lelo nga wishi nangu nyina, mulingile ukulolesha pa mulimo uwa kukusha umwana, pantu Baibele yatila, "Lekelako ku bwembya ninshi uli nokonaula umwana obe." Kibili cilya ecintu fye icisuma mu meno yamuntu ulya usoma imibombele ya tompwe onse uwatala ukubapo mwi sonde. Ico caliikalilila na nomba ukuba Icine cakwa Lesa. Nga kwaliko ifingi ifya musango filya ukucitwa, nga ta twakwata bucintomfwa ubwingi

ubwabana kabi na fimbi, nafyonse ifyabol a ifyo twakwata mwi sonde ileelo. Lelo ifunde ilyawamisha ilya kale ilya mu ng'anda lyalitobwa, akale sana, kabi balalekafye abana ukucita fyonse ifyo balefwaya.

⁵⁴ Lelo nga fintufye Nacisosa, bakapyunga, kuti baisakumanya Icine icinso ne cinso, kabi kuti bafuma kuli Cena. Mwamona, kufwile—kufwilefye kwaba... Cimoneka kwati kwalibako icintu cimo ico taba—tabafwaya ukucikumanya.

⁵⁵ Inshita ishingi Ndakwata abantu abesa, nokutila, "Naliishiba ukutila ico cishinka, Munyina Branham, lelo nga nalicitile cilya, kuti bantamfy a ukufuma mu chalichi." Nga pali cena? Nga taucitile, bali no ku kutamfisha kunse, ku mulu Kulya. Eico ulingile ukutamfiwa kunse, ku ncende imo, mwamona. Eico kanshi mulingile ukucikumanya, mucifulo ca kubutuka ukufuma kuli cena no kutila, "Ukuba, Nalaya *kulya*. Nshakabweleleko." Bwelelako, mucine, nokuya umfwikisha ifingi pali Cena.

Fwayeni mu Malembo. Yesu atile, "Fwayeni mu Malembo, pantu muli Yena mutontonkanya ukutila na mukwata u Mweo uwa Muyayaya, kabi Yena e Yalepela ubunte pali Ine." Lelo tulesanga ukutila abantu teti bacisumine cilya.

⁵⁶ Pakuba abakuletwa ku, ku Cinso cakwa Lesa tulemona ukutila ilyo Lesa apanga ubulayo, Lesa ali uwakumako kuli bulya bulayo. Kabi ilyo Alenga bulyo bulayo ku kufkilishiwa, lyena abantu balakwata umwenso ku mulimo uwakwikala ne Mbila iya ino nshita. Tulesanga cilya konsefye.

⁵⁷ Inga pali imwe mwe bena Luther? Nibanga abena Luther abali no mwenso ku, abantu bali no mwenso ku kupokelela Icine icakwete Luther lintu aishile no kulekelelwa? Moneni icacitike kuli imwe, nalimo ubumi bwenu bwine, kukwisa no kulumbula Yesu Kristu kabi—kabi no kwisa ba u—umwina Luther.

⁵⁸ Moneni imwe ba Methodisti, fintu caleba, bonse mwaleitwa bakakunkuluka wa mushilo. Ndemonia mwalishibe ico. Elyo kuti baba pesamba lya Mupashi, kabi no kusunkana uku noku. Kabi batile—balikwete "ukusunkana." Ba Meth-... Ukutila, iyo, balya tabali ba Pentecosti; balya bali ni ba Methodisti, imyaka iingi iyapitapo. Kabi balesunkana, no kututuma, kabi balewila pesamba lya maka ya kwa Lesa. Kabi baleitila amenshi pa finso fyabo nokubapuuta ne fyamwela, ukutontonkanya ati nabafwa. Kabi, nomba, mwaleitwa ibumba lyaba kakunkuluka wa mushilo. Lelo mwalikwete, ba nyinenwe na bashinwe, balingile limbi uku Cipokelela, uku pokelela Icine ne fishinka, nangu ukulukana.

⁵⁹ Nga pali imwe ba Pentecosti abo abapokelele ukubwekeshiwa kwa fyabupe, ilyo ulubatisho lwa Mupashi wa Mushilo lwaishile no kulantila mu ndimi, kabi ne fyabupe fya mu Mupashi ukubwelela mu chalichi? Cinshi, ba Methodisti

balefwaya ukumutamfya, kabili bali cicitile. Lelo mwalingile ukucipokelela. Cintu cimo ico mwalingile ukucita.

Nga pe lyashi, lintu lyaishile, palwa lubatisho mwi Shina lya kwa Yesu Kristu, kabili mwalimwene ukutila cali Cishinka? Mulingile ukucipokelela, nangu ukucitapo cimo pali cena.

Mwalikwata umulimo, umuntu onse alikwata, kabili mulingile ukufipokelela ifi fintu fyonsen. Cisuma.

⁶⁰ Kabili mwamona lyena, muli buno bushiku nomba, lintu i Cebo cakwa Lesa capanga aya mabulayo aya fintu tulemona filecitika nomba, lyena ninshi natukwata umulimo uwakuba kuli Cena nangu ukataluka kuli Cena. Mulingile... Tekuti mwikalé fye tondolo. Mulingile ukucitapo cimo pali Cena. Atile... Icintu cimo cilingile cacitwa.

Tekuti mwingile pali ulyo mwinshi wa lukuta kabili no kubwekelamo umuntu umo wine wacishilamo. Kuti mwataluka sana, nangu ukupalamina kuli Lesa, inshita yonse mwaisa muno nangu lilya mwafuma kunse.

⁶¹ Oh, ifyo cabe ca anguka ku bantu ukukana ifi fintu. Kabili Ndefwaya ifwe ukutontonkanya pali ifi fintu lintu tukatampa ukulongana kwa cintubwingi mailo mu bushiku, ukutila, Ndefwaya imwe ku kumona lintu icintu cimo icayafya casangwa, nga imwe...nga kuli ilipusho pali cena. Nga kuli ilipusho pali cena, kulingile kwaba ubwasuko.

⁶² Tutilé, ngefi, Natile Naleyá ku mboshi, kabili imwe mwasontele *uku* lubali. Ukuba, icintu cakabalilapo namwishiba, kuti Naya ukuciluka uko Ndefwaya ukuya, kabili ndi ku... Ndi pakati ka mboshi na kapinda ka kukulyo. Ukuba, nga cakutila umuntu umo ansotela ku lubali lwa *uku*, kabili Naya kulya lubali? Nalaciluka kuntu ndeya nakabili; Naciya pakati ka kulekanya ka ku masamba na kukapinda ka ku kuso. Ukuba, ilyo lyonse kuli ko ilipusho, ni nshila nshi iyakwilako ku mboshi, kulingile kwabako ubwasuko ubwine bwine ku cifulo cimo.

Kabili ilyo aya mepusho yatufikila, palwa Fishinka fya Baibele, kulingile kwabako ubwasuko ubwalungama ku cifulo cimo. Ico cishinka. Bulingile ukubako.

⁶³ Kabili ilyo twamona icintu Cimo capelwa, Ndetontonkanya, mucifulo icakubutukafye, no kusosa, "Ah, fyacabe cabe! tekuti Ncetekele icintu ica musango Ulya. Tekuti ncetekele Cilya," cinshi teti usendele Baibele, no kwikala pansi no ku Cilolekeshapo? Uku Cisoma. Muli mu kulongana muno nomba, Cilolekeshenifye. Ci Fwayeni, mwebene, ne Cebo. Fwayeni i Cebo, ukupitila mu Cebo. Iyi enshila fye imo Iyakucilenga ukulangisha Icine. Kabili Cilingile uku mweba i Cine, ukufuma ku Kutendeka mpaka ku Kusokolola.

⁶⁴ Kristu e busokololo bwa Baibele yonse. Muli Ena, Kristu, umwisulo onse. Kukufikilisha kwa ma busesemo yonse aya

Baibele yakumana ukwabula amafunde muli Kristu Yesu, pantu Aali ni Lesa ukumonekela mu mubili.

⁶⁵ Nomba tulesanga ifi fintu, nangu cibe, lintu twakumanya ici nokwisa mu kulongana, nokumona Amaka yakwa Lesa ukulaenda no kucite fintu, no kubomba imilimo iyapulamo, no kumona ilecitwa, kabili nokumona mu Baibele nokumona ukutila calilaiwa muli ino ora; elyo lintu twamona ifyo fintu, lyena tulakwata umulimo limbi ukucipokelela nangu iyo, Ndepilibula, kuli ifwe fwebene.

⁶⁶ Nomba, abantu abengi balakwata uluse, abantu abengi batila cilifye bwino. Lelo ico tacitacitita ifyo cilingile . . . Ico te cintu ico mwapelelwapo umulimo. Nga fintu Nsosele, ngacakutila . . .

⁶⁷ Nga Nali umulumendo, kabili ndefwaya umukashi, uwakuupa; kabili uyu pano umwanakashi naiminina uwali ne misango yonse iyo Natontonkenye cingasenda ukupanga umwanakashi mwine mwine. Mulandu ninshi, ku mikalile ali ni namfumu, kabili uwatemwikwa, kabili—kabili uwamibele isuma, umwina Kristu umwine mwine, icintu icili conse ico Ninga tontonkanyapo, pakukwata umukashi umusuma. Te mulandu ifyo Ningasosa ukutila untu wapwililika, alifye mucine uwalungama, teti abe umwina mwandi mpaka Namusumina kabili no mulimo wakuti ena engaba umukashi wandi.

⁶⁸ Ico e cintu cimo cine fintu i Mbila yaba. Kuti watila, “Cintu calinga, nangu *ici*, *cilya*, nangu *cimbi*.” Nokutila, “Ndeumfwa uluse pali Cena. Ndecetekela Cena Cishinka.” Lelo mulingile uku Cipokelela; kabili Cilingile ukwisaba icilundwa muli imwe, kabili imwe ukuba icilundwa ca Cena. Mulingile . . . Lyena, Cenu.

⁶⁹ Lintu waupa uyu mwanakashi uo wasala, mulaba—mulaba icilundwa cimo nomba.

Kabili e musango umo wine mwabelamo muli Kristu. Ilyo mwamona Ena ukulangishiwa no kulengwa ubutuntulu, lyena mulaba icilundwa Cakwe, kabili Alaba icilundwa cenu. Kabili, capamo, mulaba icilundwa ca Mbila.

⁷⁰ Oh, nifinga ifimato ifya filonganino ifyo twakwata ifileya kulya ku Tarshishi, fyaba Yona ba shino nshinku, fyaba imyanda pabula, icintu cimo, ubwato ubo ubusenda ubulendo ubwayanguka. Tamufwaya uku cipokelela.

Yona talefwaya ukucipokelela, ifya kuya ku Benafyalo. Talefwaya ukutwala ilye Mbila yakalabana kulya, “Mu nshiku amakumi yane, mukonaulwa nga tamwakalapile.” Alipatile ukucita cilya. Kabili alitonkenye ukutila, “Bena abena Fyalo, cintu cakosa ukwishiha ifyo bakacita kuli ine.” Lelo ali no kucicita. Mwamona? Lelo aile mubwato ubwayanguka nokuya ku Tarshishi, aile mu cipinda ca bwato no kusendama; aile mu nshila iyaanguka.

⁷¹ Ninshila iyaanguka, ninshila iyalumbuka na bantu. Cintu caanguka ukusenda inshila iyo umuntu onse enga kupampasha mu numa nokutila uli muntu umusuma, "Kabili uyu ni kampanda *wakuti-na wakuti* kabili umo," kabili isonde lili no kulolekesha pali iwe. Cintu ca anguka ukuya mu nshila iyalumbukwa.

Lelo lintu—lintu mwaba aba kucite cintu cimo icapusana, ilyo muli no kwiminina ku kushininwa kwenu pafyo mwaishiba ukube Cine, apo epabela ulubali ulwakosa, palya epo cishupila, palya pene.

⁷² Oh, nga fintufye twaleimba lulya lwimbo ulwakale:

Ifyo caba icaanguka ilyo tuleoba pali bembra,
kabili pali tondolo,
Ku kusubila mu maka yakuboko kukalamba
kwa kwa Yehova.

Lelo, oh, lekeni amabimbi yatendeke ukulapupa, leken—lekeni icipupu cipupe no kufumyapo amabimbi, elyo ni cinshi mucita?

⁷³ Icintu cimo icapala cilya ba Njebele, inshita imo, ukuti umukashana alisosele. Kunuma kulya ku nshiku sha bakabalwe na maceleta, atile kabalwe abutwike pamo nankwe ukufuma mu chalichi. Atile, "Ni cinshi wingacita?"

⁷⁴ Atile, "Nalicetekele Shikulu mpaka ilyo intambo shaputwike." Ukuba, iyo enshita iya kucetekela Shikulu, panuma ya...panuma ilyo intambo shaputuka. Mulacetekela muntambo mpaka ilyo shaputuka. Ee.

⁷⁵ Kabili eico tulesanga ukutila ifwe twalikwata inshila isha anguka ishingi ishakubutukilamo, ifimato ifileya ku Tarshishi, pantu cintu caanguka, ishishaba imilimo. Cabafye icaanguka, namukwata fyonse ukulaisa; umuntu onse, ali mutemwa. Kabili, umuntu onse, waba...Tapali nangu umo uwaku kansana nobe; ta mukansana no muntu nangu umo. Nomba, nga cakutila cilya te cisalu icakupukutilako imbale! Ico cishinka. Ee, ukucisunka, ukucipilibula! Cinshi, umuntu uuli onse, Nshilesakamana fintu waba, kabili ne fyo waimininapo...Mucine, abantu abatekanya mukutontonkanya bakatontonkanya sana pali iwe nga cakutila waimininina pa kushininwa kobe pali ico icalungama. Cishinka. Nshilesakamana...

⁷⁶ Sendeni umwanakashi, limbi ena tekuti abe uwaemba sana, na fyonse efyo engaba; lelo lekeni ulyo mwanakashi eminine pa mafunde ya bwanakashi, lekeni eminine ngo namayo; kabili nga cakutila umwaume nakwata ukufina kumo ukwa bwaume muli ena, ali nokusenda ulya mwanakashi. Mucine cine. Tulatascha icintu cimo ico—ico umuntu umo akwata, ukutila balicetekela ukutila cilya cine kabili bali no kwiminina pali ico eco batontonkanya ukutila nacilungama.

⁷⁷ Ifyo baba abanenuka-nenuka, filya efyo abena Kristu abengi ileelo, baba abanakuka nganshi na fyonsefye, mpaka batontonkanya icintufye ico baligile ukucita ukuilunda ku calici, ukuya ku cifulo cimo, ukulembesha ishina lyabo pe buuku, nangu ukucita icintu cimo icinono ukutoloka pamuluna-panshi, ukubilikisha, nangu—nangu icintu cimo icapala ngeco, nokuciita ubwina Kristu.

Ubwina Kristu ni cila bushiku, umweo uwakalabana, ukwikalilila na Lesa muli...muli lino isonde lyelelo. Caba Mulilo uleyaka lyonse ne citemwiko cakwa Lesa, mumutima, ico icibika imwe pa mulilo no kumutwala kulya ku bantu, ku kulenga abakucetekela muli Kristu. Imilimo.

⁷⁸ Lelo cintu ica anguka ukuya mu nshila iyo aba mwisonde bayamo. Cintu ca anguka ukukonka ukuleya umukuku.

Kabiye kunse kulya nokwikala mu mumana, nobwato bobe. Bula inkafi shobe no kutendeka ukulaoba ukulefuma umukuku; tekuti usende inshita iitali, kibili cilakoselako. Lelo ulekelekofoye ku nkafi umuku umo no kumona ifyo bwalapita mu fimuti bwangu bwangu ukuya kwisamba, lelo lolekesha kuntu uleya!

Lintu ifintu fili ifya anguka, ibukisheni, muleya ku-ku cipoma icikalamba kwisamba kulya, icamusango uyo. Uletentemukila ku cipoma, kibili teti cisende inshita mpaka uli no kuponena mulya mu cipoma. Nga uleendafye ne sonde, cilanguka, umusango cishilamo, taufwaya cilya. Iyo, mukwai. Lelo ulingile uku-...ukusumina umulimo obe.

⁷⁹ Nomba, mu Cicetekele, kibili mwalikwata u-... Mutontonkanya ukutila Cena Cine.

⁸⁰ Kibili umulimo untu Lesa atupela muli buno bushiku, ku kuleta iyi Mbila! Kibili lintu Ndeya ndekota, kibili Naliishiba inshiku shandi shiya shilecepelako, kibili Ndeumfwa ukuba no mulimo ukalamba ukucila fintu Naleumfwa. Ukuya pa ntanshi, tulingile ukucicita! Tulingile ukuya kuli cena, konse kuntu tuleya, no kushimikila i Mbila; no—no kweba abantu ukutila Yesu Kristu aleisa, ukutila Ena ni Lesa kibili Aleisa nomba line. Takuli—takuli isubilo nangu limo ilishele mwi sonde lelofye Ukwisa kwa kwa Shikulu.

⁸¹ Nga mwati mulolekeshe kunuma kulya kufibuso fimo efyo nali nafyo kulya lintu Malaika wa kwa Shikulu...Aba abalumendo abekele muno, Ndecetekela balisanga incende pantu cacitikile ku mulu kulya. Kibili ibukishenifye ifyo Shikulu asosele bulya bushiku, kuli Munyina Wood. Elyo aleenda pamulu walupili. Kibili—kibili ali kwati alelila, pantu umukashi wakwe alilwele. Kibili Shikulu atile, “Tole libwe lilya no kuliposela mu mulu mu mwela, no kusosa, ‘EFYA SOSA SHIKULU.’” Kibili Nacitile cilya. Kibili Munyina Wood ekele palya nga kambone.

⁸² Kibili Natile, "Munyina Wood, tacapose inshita sana mpaka ukamone icintu cimo ukucitika." Kibili ubushiku ubwakonkelepo, lintu twaiminine palya, bonse capamo... Kibili ibumba lya baume iliminine muno mwine muno bushiku.

⁸³ Kashimikila umunono ali kulya, kibili ali... Nalimwene... Nalimukumenye inshita ya bushiku imo. Ali munkambi yesu. Alishile mukuba naifwe. Kibili atile kuli ine, atile, "Munyina Branham, bushe walitala aumonapo ifimonwa, kunse ngefi?"

⁸⁴ Natile, "Ee, mukwai. Lelo Ndesa kuno ku kwesha ku kufuma kuli cena, kukwesha ukutusha panono." Atile... "Ukuba," Natile, "Ine—Ine... Mucine, Ala ndangisha ifintu kunse kuno." Kibili natile, "Pa mulu wa lupili lwa kuno kwinefye, kuntu ba Malaika Cine-lubali bamonekele kwisamba kulya."

Atile, "Ee, naumfwा." Atile, "Nali umo uwaleafwilisha ukulongana kobe kulya mu California."

Natile, "Ukuba, Ndi uwansansa pa kwishiba ico."

⁸⁵ Kibili lintu naiminine palya, lilya linefye Nalolekeshe mu mbali kibili Namwene dokota uwaina uwaleolekesha mumenso yakwe, kibili Naumfwile aletila, "Uli no kulufya ili linso, pantu muli ubulwele bumo. Kibili Nalibombelapo pali lyena pa myaka ibili, kibili uli no kulufya ili linso."

Natile, "Umulandu unjipushishe ico, nico dokota obe akwebele ubushiku ubwafumako ukutila uli no kulufya ilyo linso."

Kibili atile, "Ico nacilungama," kibili arolekeshe mu mbali nga *filya*.

⁸⁶ Kibili Nalimwene ba nyina ukufula lumo pa nsokoshi shabo kibili no kwikata ulukasa lwabo, no tupute utunono utwali pakati ka tukondo twabo, pamulu-na-panshi kukulu kwabo; kibili batile, "Nga wamumona Munyina Branham, ukamwebe aka mpepelepo pali ici."

Kibili natile, "Ukuboko kwaba noko na...na bemya ulukasa lwabo nga *filya*, kibili batile naba kwata...utupute utunono pa—pa tukondo twabo, kibili nga *filya*; kibili batile, 'Ukebe Munyina Branham akapepe.'"

Atile, "Munyina Branham, ico cishinka."

⁸⁷ Naloleshe ku numa. Ilyo Nacitile ico, Nali mumwene naiminina kunuma kulya ukulalolekesha kuli ine, nga *filya* fine, na meno yakwe yalifye bwino. Nali mukumenye ili line; alikwete amenso ayasuma ukucila onse mu nkambi. Shikulu ali muposeshe no kumulenga ukuba bwino.

⁸⁸ Lintu Naiminine palya pene, Shikulu atile, alinangishe ifyali no kucitika. "Ubupingushi buli mukuponena Ululamba lwa ku Masamba." Kibili Atile, "Kabiye kulya lubali lwa ncende ya mulilo."

⁸⁹ Kibili Nalikwete fosholo mu kuboko kwandi; naiile palya. Kibili Munyina Roy Robertson, ifwe bonse twalimwishiba kuno. Talimo muno mu bushiku, nga fintu Njishibe; ali ku Arizona kulya. Mukalamba wa ma trustees kuno, kibili Nalimwishiba ena ukuba uwaishibisha. Kibili icintu cimo cali mupepi no kucitika; inshita iisuma, iya lucelo ulwatalala, nalimo ku ma teni koloko ulucelo. Kibili abalumendo bonse bali kulya, ikumi nangu ikumi na na babili bonse capamo, ukulapanga amatenti, kibili no kufunda impapa sha nkumba, ne fintu. Eico ifwe... Naliile kulya, Natile, "Roy, fisama, bwangu. Icintu cimo cili mu kucitika." Nshamwebele nakabili. Lelo inshita ilya ine Nafikile kulya...

Kibili ukufumina mu myulu kwaishile kankungwe wa kwa Lesa, nokuma akapi, kwati, ukutenkanya impili, ukwingila mukati ka lulyo lupili, ukuputaula akamulale ukuka shingulusha, ukuciluka nalimo ama flti yasano ukutula pa mutwe wandi, no kuputula pa mulu wafilye simuti ukufifumyapo, lintu amabwe yaleshukuka. Kaile mulwelele no kwisa pansi na kibili, no lubatisho na lumbi ulukalamba, no kwisa puma pa mulu wa lupili, no kuposa amabwe ukuyashula nga filya. Kalicitike imiku itatu, kibili kaliile mulwelele.

Kibili Munyina Banks aishile kuli ine, atile, "Cilya e co wasosele mailo?"

Natile, "Ee, mukwai, ico cishinka nganshi." Mwamona?

⁹⁰ Kibili inshiku shitatu panuma ya cilya, Alaska aliibile, mupepi, kulya lubali. Kibili ku mulundu-na-kwisamba kulya ku Lulamba lwa ku Masamba kwalibako ifibulumo no kusunka, kibili ne fintu fyonse ukula citika. Kibili ubushiku bumo pali ishi ali no kwibila pansi ya bembra. Cishinka. Ni cinshi? Tuleikala muli ilya ora ya Kwisa kwa Shikulu.

⁹¹ Ilyo twamona amasambililo yambi ne fintu ukulaisa, kibili ne fi fintu fyonse ifyapusana, natwishiba kulingile kwabako ubwasuko ubwacine kuli ici.

Kuliko abantu mukati ka calo muno nomba, abaleyia mu ncengo ne fintu, "Kibili muli Kutumpu pa 16," mwalibelenga mwipepala, "Shikulu aleisa." Mwalishiba ifyo tefyo caba.

Yesu atile, "Takwaba umuntu uwaishiba miniti nangu ora."

⁹² Lintu twamona ifintu fyonse ifi, nefintu ukulacitika mumusango filecitikilamo, kibili kulingile kwabako ubwasuko ubwacine kumo. Kulingile kwabako Icine. Kuliko bumo, ku kabanga; Kibili bumo, kumasamba; lelo kuliko bumo, pakati kakukapinda kakulyo na ku kabanga, kibili pakati kakukapinda kakukuso na ku masamba, nangu icintu cimo. Lelo kulingile kwabako ubwasuko ubwa cine, kucifulo cimo, ku bwafya. [Tapali amashiwi pali tepu—Kale.]

⁹³ Ukukana ici? Tulingile ukweba abantu ukutila tuleikala munshita sha Kwisa kwa Mwana wa kwa Lesa. Tulefwaya—tulefwaya ukumona kibili (Lesa) abe uwa kwenda, inshita yonse, uwaiteyanya ku kupela umuntu ubwasuko ubwalinga.

⁹⁴ Lyonse efyo ciba ifyo fine. Ca—caliba mu muntu, alikana no kutaluka ukufuma kuli Lesa, inshita yonse ukufuma pali Adamu, mwibala lya Edeni. Lintu Adamu ali mwibala lya Edeni, lintu aishile pa mulimo uwaku isalila umwine, kuti aikala na Lesa nangu ukuba no mukashi wakwe? ali no kukwata ulyo-... ali no kupanga cilya, u—umulimo wali kuli ena. Ali no kusenda ifyo umukashi wakwe asosele nangu ifintu Lesa asosele. Kibili lintu asalile uku konka imibeleya mukashi, kibili ilyo acitile cilya, lyena alufishe imibeleya yakwe iyantendekelo. Kibili aletelele isonde lyonse ku mfwa, lintu ali no kusenda umulimo, nangu ukupokelela ulubuuto ulupya ulo umukashi wakwe asangile, ico icali icapusana.

O mwe Lesa! Tontonkanyeni pali ici. Lesa abapele nalimo Ifyebo cine konse-konse nangu ikumi ifya kusunga. “Lelo kuli ici cimuti mwi kalyako.” Epela fye efyo bali no kusunga. Kibili nangula bali ne Fyebo ifingi ngefyo, bali Citobele.

Elyo Adamu ali noku kumanya, “Bushe, Nalacita, Nalacita nga fintu umukashi wandi anjebele ukucita, nangu Nalacita fintu Lesa asosele ukucita?” Kibili aliile na menso yakwe ayaisulwa. Ali no kukwata umulimo. Cilya caposele umuntundu wa bantu mu mfwa.

⁹⁵ Elyo kwaishile Adamu ulya umbi, uyo uwali ni Kristu, takwali nangu umo uwupalana na Ena! Umuntu umo kuti asosa ukutila Tali ni Lesa? Ukuibela kwakwe kwa shininkishe ukutila Ali ni Lesa. Takwatala akuba icibumbwa icapalana na Ena. Aikele mwi sonde ku Mwine. Afyalilwe kunse ya mitantikile ya cifyalilwa, umuntu umubembu. Alleluya! Ali ni Kalenga Umwine ukulengwa mu mibili.

Nani wingatala ukwiminina pantu Aiminine? Nani uwatala ukulanda nga Ena? Nani uwingatala ukulanda ifintu ifyo Asosele? Nani uwatalile ukucita ifintu ifyo Acitile? Ukuibela Kwakwe kwa shininkishe ukutila Ali ni Lesa. Takwali kasesema nangu icintu cimbi icashala icatalile ukucita fintu Acitile; Nani uwingeta abafwa ukufuma ku nshinshi, Nani uwinge iminika imyulu, kibili no kucita icili conse ico Alefwaya ukucita. Ali ni Lesa. Nani uwatalile ukwiminina mu cifulo Čakwe? Ni nani? Kuti Aba shani lelo kulyo kupwililika, Lesa uushifwa, alengelwe mu mibili no kwikalaka pakati kesu!

⁹⁶ Tapali nangu cimo icinga palanishiwa kuli Ena. Aikele mwisonde ilyakwe Umwine. Takwali umuntu uwatalile ukulanda nga Ena. Lintu Aiswilefye akanwa Kakwe, kwaliko icintu cimo pali cena, icali icapusana kumuntu uuli onse. Umuntu umo atile Alifye ngo muntu uuli onse; Ndekanya cilya.

Ali ni Lesa. Ifyo efyo Aali. Pantu, takuli umuntu uwatalile ukulanda nga Ena, takuli umuntu uwingalanda nga Ena, pantu Ali i Cebo ca mweo Icine ukulengwa mu mubili, ukulangishiwa ukutuntulu ukwa kwa Lesa.

⁹⁷ Nalasumina, balya ba kasesema balikwete imbila shabo. Bali bakwete lilya; bali bakwata na nomba. Lelo kwaliko umutwe wa Bulesa mubwisulo mu mubili, uku langishiwa palya. Ali ni Umo uwaibela, kabilo Ena ni ulya Umo uwali no kulolenkana na ulya umulandu. Namaka Yakwe yonse ayo Akwete, icakutila nga Ali icine cine imfumu ye sonde. Akaba; kabilo Ena, ku bashila Bakwe, efyo Ali nomba.

⁹⁸ Aliiminine palya. Muntunshi uwingaba umupina, takwete ne ncende yakulalikapo umutwe Wakwe; uyo uwa ishibe no kwishiba uko isabi lyaminine ikobili? Nani, muntu nshi uyo uwingasenda imitondo iya menshi iikulu no kuyapilibwila mu mwangashi, no kukana kwata incende yakulalikapo umutwe Wakwe? Alingile ukulolekana ne milimo iyo iyapelwe mukuboko Kwakwe. Muntunshi uwinga busha umuntu ukufuma munshishi, panuma lintu afwile inshiku shine no kubola?

Bushe Ena nga taipuswishe Umwine? Icine, Alicitile; lelo nga Ali cicitile, nga Tatupuswishe. Alingile ukulolekesha pa milimo, kabilo na pa mulandu wa cumfwila Cakwe ku Cebo! Uko, ukukana umfwila kwakwa Adamu, kabilo ena asendele inshila ipi, i—inshila yakuya ku Tarshishi. Lelo Yesu asendele inshila iyakuya ku Nineveh, ku bena Fyalo, ku kuyaisendela Umwine Nabwinga. Ndi uwansansa ukutila Nacicita cilya, muno bushiku. Kabilo tulingile ukumona ku fishinka, ukutila tuli Abakwe, no kufumyapo isonde. Amen!

⁹⁹ Umuntu uuli onse alingile uku kumanya cilya, uyo uwawkwata umulimo kuli Lesa. Kuti twasendifye, tutile, Nowa. Alikwete. Nowa, Mose, Eliya, na bonsefyé mu—mu nkulo yonse, bali lolekeshe pa mulimo. Kabilo baliciticile, lelo uyo e mulandu batuminwe muli ilya ora.

¹⁰⁰ Lolesheni pali Nowa munshita yakwe iya science, ifyo aali nokumona pa cintu ico icishali ica science. Cinshi, takwaliko u—u—umulandu cishabele icishili ica science... Mwamona, cali—cali icabulamo science, ntile. Cinshi, batile yali no kuloka ukufuma mu myulu. Tabatalile ukukwatapo imfula ukuloka ukufuma mu myulu. Nomba, alingile ukulolekeshapo. Lesa atile yali no kuloka. Elyo kabilo ena...

¹⁰¹ Kanshi icicetekelo icabule milimo cintu cafwa; nga mwatila, “Nalicetekela,” kabilo tamulecitapo nangu cimo. Kwatifye ni Mbila, nga mwasosa ukutila, “Nali icetekela,” tamulecitapo nangu kamo, busuma nshi cicita? Mwamona? Nowa aile mu kubomba na sando yakwe no kukula ubwato, ku kushininkisha ico alelandapo. Ico eco tulingile ukucita, naifwe. Tulingile ukuya

mu kubomba no kushininkisha icitetekelo cesu, ku milimo yesu. Imilimo yesu ishininkisha icicetekelo cesu.

¹⁰² Mose alicicitile, na Eliya alicicitile. Kasesema uli onse mu nshita yakwe alinokwiiminina no kulolekesha pali iyi milimo. Lelo abengi pali bena tabacitile nga Yona. Alibutwike; bena taba butwike.

¹⁰³ Moneni, “Bilikisha no kucisusha cena.” Oh, owe! Ico cili apo. Ilyo e sambililo, “Bilikisha ukususha cena.” Apo epali iciputulwa ica kucecentwa.

Kabiyefye kulya no kuya eba balya balumendo, “Ukuyasosa, Ninjisa ukuba pamo naimwe mwe baume. Namwishiha, Ninjishiba, Ndecetekela ndi no kumweba ifyo Ndi nokucita. Ninkwata akantu akanono pano Ndecetekela kuti Naipanga i...ukutuleta ifwe bonse capamo, no kucita *ici, cilya, nangu cimbi.*”

Lelo, cali, “Bilikisha ukususha cena,” lintu ulingile ukubilikisha ukususha icintu cimo. Nomba, ali nokubilikisha ukususha fyonse ifyali kulya; bilikisha ukususha umusumba, bilikisha ukususha imilimo yabo, kubilikisha ukususha ichalichi lyabo, bilikisha ukususha bakasesema wabo, bilikisha ukususha bakashimikila wabo, bilikisha ukususha bashimapopo wabo. “Bilikisha ukususha cena, icintufye conse! Bilikisha ukususha cena!”

¹⁰⁴ Nowa abiliikishe ukususha inkulo yakwe. Mucine, alicitile, ukususha ama chalichi ya munkulo yakwe.

Mose mucine cine alibilikishe kukususha inshita ya—yakwe; abantu, bashimapopo, nabambipo. Alibilikishe monse fye mulya mumatololo. Kibili na pakupatukila ponse, alibilikishe, lyonse ukulabilikisha ku bantu.

Eliya ali ushalumbukwa sana mu bushiku bwakwe, pantu alibilikishe ukususha ilye nkulo. Mucine ali citile.

¹⁰⁵ Yohane Kabatisha ali ushalumbukwa nganshi munshita yakwe. Alibilikishe ukususha inshita alimo. Atile ku mfumu, intungulushi ya—ya iya—iya calo; ali—ali kwete, aupile umukashi wakwa munyina. Ali shimikile pacupo nokulekana, ulucelo lumo. Eico alibilikishe ukususha cena, atile, “Te funde kuli iwe uku mukwata.” Calimuletelele, umutwe wakwe ukuputulwa, panuma, lelo alibilikishe no kwiminina kwi ofeshi ly a ncito yakwe.

Tatalile ukusenda ubwato ubwa ku Tarshishi, nokutila, “Ukuba, Nalasuminishanya naiwe, Herod. Cilifye bwino. Ilyo lyonse uletontonkanya ukutila umwanakashi umusuma, akaba umukashi umusuma kuli iwe, twalilila.” Oh, uluse. Shilya insalu shakupukutilako imbale, mwamona, ee, akantufye akali konse akanono... Cinshi, tacaba nangu cimo lelo ca kusamfishakofye imbale.

¹⁰⁶ Lelo, moneni, Yohane tali muli ilya inshila. Ali bombele pali cilya. Atile, “Tacaba ifunde kuli iwe ukumukwata.” Ee, mukwai. Kabili aliiminine ukucisusha cena.

¹⁰⁷ Tabatalile ukubutuka. Yohane tabutwike. Baliiminine nokuba pa fishinka. Mose alyeseshe ukubutuka, inshita imo, nga Yona, lelo Lesa ali mubweseshe na kibili. Abengi pali bena balyeseshe ukufuma kuli cena; kuti batendeka . . .

Lelo, lolesheni, nga Lesa alikwita kibili muli abashininkisha ukuti Lesa ali mu Mbila, takwakabe nangu cimo icikamubwesha kunuma. Taca mubweseshe Yona. Iyo, mukwai.

¹⁰⁸ Amos uwakale, alilibikishe, atile, “Inkalamo naibuluma, nani uyo uushinga tina? Kabili Lesa nalanda, nani uyo uushinga sesema?” Nani uyo uushinga sesema, lintu wamona Lesa alelanda kibili atile icintu cimo cikacitika, kibili cilya cili apo?

¹⁰⁹ Inkalamo nga ya buluma, onse alomfwa umwenso, ee, mukwai, nga mwalitala ukumfwapo ukubuluma kumo mu mutengo. Mulomfwa ishi ishilila nga bapushi ishi bafungilila kuno, shilye nkalamo ishatekwa, lelo mulingile ukumfwa ilya ya cine, iya mu mpanga ukubuluma inshita imo. Amabwe ayanono yali no kupona ukufuma kulupili, amayadi imyanda isano ukatalukako. Ndefwaya ukwishiba uko iciunda conse cilya cifuma muli balya bapwapwa. Kabili alabika umutwe wakwe panshi, alemya yalya amasako yakwe pa mulu; Nshatala ukumfwapo nangu cimo . . . Kwati mu—munshinga ulepoleka, lintu afumya cilya ciunda ca kubuluma uku kalamba muli ba pwapwa bakwe. Nani ushingatina?

Batila, nga cakutila waipaiwa ku nkalamo, takubo kumfwa ubukali. Ila mupelo mwenso wa kufwo mutombo ilyo tailamwikata. Mwamona, imwe tekuti muimone. Ilamutinya na kulyo kubuluma ukukalamba ukwa maka, panuma yakashita akanono ninshi naikwikata.

¹¹⁰ Atile, “Inkalamo naibuluma, nani ushingatina? Kabili Lesa nalanda, nani ushingasesema?” Iyo mwamona Lesa ukucita icintu cimo, mwatila . . . “Limbì tekuti mbe kasesema . . .” Yona efyo asosele . . . “Limbì tekuti mbe kasesema, nangu umwana wakwa kasesema. Lelo Lesa nalanda, nani ushi ngasesema?”

¹¹¹ Limbi tekuti mbe kasesema, limbi tekuti *Mbe ici, cilya*, nangu *cimbi*. Iyo Namona Lesa alecita icili conse, kabili Nacimona muno mu Cebo, kabili Ali cilaile, nani uwinge kala tondolo ukuba shilili? Mucine, Alicicita.

¹¹² Kabili tekuti tufisame mu fisumino noku ukulongana konse ukwaba kuno, kabili ukuya ku-ku Tarshishi. Tatulefwaya ukuba pamo no kulongana kulya.

¹¹³ Lelo abengi, kwati ni Adamu, balacita icintu cimo cine, ukwesha ukubikapo icakupyanisha mu musango umo, ukwesha ukufwaya inshila imo iyakufuminamo, kabili—kabili nokupanga

icakupyanishapo, kuku kumanya Lesa. Panuma ilyo baishiba ukuti bali mucilubo, kucinso ca Cishinka, aile no mukashi wakwe kibili no kucita filya finefyе ifyo Lesa amwebele ukukana cita. Ailefyе pa ntanshi no kucicita, nangu cali ifyo. Kibili elyo aisangile umwine ukubo bwamba, umwanakashi na ena, bonse babili, mwi bala lya Edeni. Amenso yabo yaishile isulwa. Baliishibe ico icali icalungama ne cilubo, lilya. Elyo kibili alyeseshe ukusanga icakupyanishapo, ku kwesha ukuifimbilikisha umwine na cena.

Nomba, ifyo e musango tucitilamo ilelo, apa ku kanina, ukusosa, "Ukuba, Ndemweba, nga cali ni *muno*, nangu nge *ci*." Nangu, "nga, nga, nga," ico cabafye... Mwamona? Lelo mulingile ukulolekesha pali cena. Cilingile cili icalungama nangu icilubo. Kibili nga cili icalungama, lekeni twikale naco. Nga cili icalubana, fumeniko kuli cena. Epelafye. Ukusenda cinshi... Fwayeni ico icili icalungama. Tamulefwaya ukulolela na kibili. Lekeni tusange nomba ico icaba i Cine kibili ne cili icalungama, no kwikala naco. Twaliishiba ukutila cishinka.

¹¹⁴ Nomba, tulesanga ilelo ukutila abantu besu balifye... Cilemoneka kwati ubufuma cumi bonse bwalifuma mukati ka ma chalichi. Ine... Muli...

¹¹⁵ Tuleikala mu ng'anda kulya iyakwa nkashi yesu umusuma uyo uwisa kuno ku chalichi. Limbi naikala muno muno bushiku. Kibili alaisonkesha ku bakwe... abantu. Kibili aliba umusuma nganshi kuli ifwe pali ilye ncende, pa kutuleka ifwe ukukwata ilye ncende. Kibili eico cuti Nalumbula ishina lyakwe, lelo limbi tekuti atemwe ine ukucite co. Kibili aliba umusuma nganshi kuli ifwe, cisuma, mucine cine tekuti—tekuti tutemwe uku muleta palwelele. Lelo aba Lyonse umwanakashi uwatemwikwa, uwatemwikwa nganshi. Kibili mu ng'anda, kwaliko icitunshi tunshi ulubali ku lubali lumo. Twalikwata iinono, ibili, imiputule ibili.

Nalikwata ulupwa ulukalamba, kibili ne bumba lya baice, kibili ifwe... kibili na—namwishiba, kibili balingile ukukwata ama sanshi, kibili ayengi. Kibili ifili fyonse ukubikwa pa mulu, kibili ulingile ukupita muli *ici* kibili muli *cilya*, pakuti wingile no kufuma.

¹¹⁶ Elyo kibili kuli ilya incende balikwete icitunshi tunshi. Kibili muli *ici* icitunshi tunshi, aba baice baletamba, pa Mulungu ulucelo, ifyapala ukwimba inyimbo-sha kwimba eshaishilepo. Kibili, namwishiba, cuti—cuti camulenga imwe ukumfwafye insoni; nga takwaliko ubwina Kristu ubwine bwine ku cifulo cimo uko wingabikapo amaboko yobe, ku kumona ico iciitwa ubwina Kristu. Mulandu nshi, cilemoneka kwati bonse ubufuma cumi bwalifumamo muli bwena. Mulandu nshi, tabacita, taba moneka kwati uku... Mulandu nshi, cintu cabipa sanafye umusango beminina kulya no kufunga amakofi no

kulwa umo no munankwe, palya, no kwesha ukwimba inyimbo shamucitabo na fyonsefye nga filya; no kulanda amashiwi yakusekesha ayo coba tekuti alande, no kusosa ifintu ifyalekana lekana, kibili ukubepa no kutwalilila. Namwishiba, umushilo uwa—uwa—uwa bwina Kristu walimoneka ukulufya icifulo ca uko.

¹¹⁷ Nomba, nga Naya ku chalichi no—no kumona pastor aiminina palya no kubilisha ukutila kwala—kwalabako uku u—ukusamba kwa cintu bwingi. Bonse abanakashi mu fyakufwala fya kusambilamo, bonse bali no kuya kulya. Bali nokuya kwata ukucimfyanya; aba banakashi, ukuyasamba. Kibili bali no kuya kwata a—amalila ayapala ifyo, kibili bali no kuya salula i—inkoko ishingi, no kuteya bunco, kibili—kibili ne fintu ifi fyonse nga filya. Kuli ine, cilya cilasenda ubufuma cumi ubwine bwine bwa bwina Kristu; ukucitafye icili conse.

¹¹⁸ Nalimona, ukwisa kuno, tulesanga ukuti... Namwishiba, tulesanga bankashi yesu abengi ukufwala utuputula, kuli ino ncende mu calo catalala, ukucila filya mwingabasanga kulya muli cilye calo icakaba. Mwamona, cishinka. Kulya lubali uko ukwakaba icine cine, takwaba abengi abatufwala. Lelo kuno, uko—uko ukwaba ukwatalala, bala—bala cicita. Mwamona, caba, tabeshiba ukutila ni ciwa eucita cilya. Mwamona? Nomba, nga cali icawama, nga cali icaku yafwilisha mwebene, kuti cabe icintu cimbi. Nangu mwaume, Ndetontonkanya cilamoneka icabipa ku mwaume, lelo—lelo imwe—imwe kuti—tekuti muposeko amano ku mwaume. Lelo, umwanakashi, umubili wakwe—wakwe wa bukata, kibili alingile uku usunga muli ulyo musango. Kibili ukumona abakote...

¹¹⁹ Kuti mwamona, abantu ilelo. Kwaba imipashi ibili. Kibili umo pali shena Mupashi wa Mushilo; umbi nao mupashi uushashila, kibili umo alatungululwa na ulya. Kibili bonse babili ni bakapepa. Nomba, ee, ico eciputulwa icaibela, bonse babili baba ni bakapepa. Kibili nga filya fine Esau na Jacob bali, bonse babili bali ni bakapepa; kwati ni Kaini na Abel fintu bali, bonse babili bali nibakapepa; nga filya Yuda na Yesu bali, bukapepa bubili, bonse babili bakapepa. Kibili tulecimone lelo, imbali shonse shibili, isha bukapepa. Mwamona, mupashi umo wine. Abantu balafwa, lelo umupashi taufwa. Ulatwalilafye, bonse babili bakapepa.

Umo pali bena untu aiketwe na Mupashi wa Mushilo, uyo uwikala umusango wa bumi uo balingile ukwikala, no kwenda kwa bulesa na mu cishinka. Tekuti bakufumyemo nangu panono, kibili bena—bena balacita icili conse ico benga cita mu cishinka ico benga cita, ku kumwafwilisha. Kibili bambi bali... Abasumafye nge fyo balingile ukuba.

Kibili aba bambi, tulesanga ukuti, fintu fye fimbii ifyaibela. Kibili, nangu cibe, yonse ibili yabe mipashi yabukapepa, yaba

ibili; umo, Mupashi wa Mushilo; kabi no ubiye, mupashi uwakowela. Kabi nga cakuti namumona, cili no kuba, nangu balanda ukutila ni bakapepa, bali no kumuseka imwe no kumwita bakakunkuluka ba mushilo. Balacita icili conse ico bengacita.

¹²⁰ Bena, ukukana i—i Cebo cakwa Lesa icishipilibuka, kwatifye ta Catalile ukulembwa.

Mwamona, kuti mwatoso ukutila, “Nomba, lolesheni kuno, nga—nga cakuti ulubatisho . . .”

“Nalikwata u Mupashi wa Mushilo!”

“Kabi nawiminina palya no mushanga mukuboko kobe, ule uppepa?”

“Ee, Nalikwata u Mupashi wa Mushilo! Nshiletontonkanya ukutila cilubo ukunwako panono. Nshile citontonkanya . . .” Mwamona?

Kabi bushe namumona, “Nshiletontonkanya”? Lelo Lesa alatontonkanya fimbi, mwamona, ukulingana ne Cebo Cakwe. Mwamona? Mwamona, bala . . . Kabi bala—bala citafye ukucilapo ngo—ngo kufewishila amate pali Cena. Ico cishinka nganshi.

¹²¹ Kwatifye nga ulya umulumento umunono umukote uwalemana amolu uwa amfwile pali ilya inshita, lintu Davidi aletamfiwa pa cipuna cakwe ica bufumu. Aleya pa mulu wa Lupili lwa Miolife, ukulaya, ukulalila ilyo aleya, ukulalolekesha kunuma. Kabi ilyu mulumento umunono umukote alyamfwile kuli ilya incende kabi alemufewishila amate. Kabi ulya malonda atile, “Nalaleka u . . . ulya mutwe wambwa ukuba pali ena, ku kushipila amate pa mfumu yandi?”

Davidi atile, “Mulekeni abe.” Mwamona, bali mufewishiile amate.

¹²² Nalimo panuma ya myaka imyanda cine konse konse, bafewishile amate pa Mwana wakwe, Yesu Kristu, nao.

Kabi ileelo balefewishila pali Ena na kabi. Kwatifye ta Califye nangu . . . Ukwabulo mucinshi, ukwabulo kusakamana, bapilibuka imitwe yabo no kutaluka kuli Cena, nokumuseka. Mulandunshi cabele fi? Bali mu bwato ubuleya ku Tarshishi. Cilya efyo cili.

Ubu bwite kuli Lesa, mulingile ukubila ukususho bubi, bileni no kususha ulubembu, bileni no kususha ifintu ifyo ifili ifyalubana. Nomba, ibukisheni, efyo cikaba.

Imwe, namwishiba, ino nshita. Namwishiba, Ndi nama ora yabili ayapusana. Kabi mu Tucson yabafye ama miniti ikumi ukucila pa seven koloko, kabi—kabi cilikwati Ndefuma mu—kwati ndefuma mu ncende yandi kuno. Huh? Cilifye bwino.

¹²³ Nomba ibukisheni, tukesa asukilapo pali cena. Ibukisheni, balya aba shipile amate Kristu balyaswike pali cena.

Lintu Davidi abwekele ukufuma mukufisama kwakwe, lintu ali imbutushi, kabilo lintu abwelele, ibukisheni, uyu mulumendo awilile pa cinsو cakwe no kulilila uluse. Afwihile amate pali Davidi, ilyo aleya, lelo alifye mupepi uwaiteyanya nganshi ukusamba inkasa shakwe ne filamba, kabili, lintu abwelele.

Kabili ubushiku bumo balya abalashile Yesu bakacimona.

Kabili balya abale Mulasa ileelo baka cimona, nabo. Bena, ubushiku bumo, cikababwelela. Ibukisheni, Ukusokolola 22, Alefwaya ifwe ukusunga i Cebo icili conse ico Ena alembele; i Cebo conse.

¹²⁴ Nomba natwisha Icinso Cakwe cili pano. Cintu cashininkishiwa. Twali cikwata. Tulecetekela, muli uyu mulungu uleisa, cikatwalilila ukushininkishiwa pakati kesu; abalwele bakaposhiwa, kabili ne fintu ifikalamba fikala citika.

Tatulefwaya ilyan ilya kulumbukwa. Tulefwaya Icine. Kabili tatufwaya, ifwe (tufwaya) tatulefwaya uku—tatulefwaya ukuba ku cintu icili conse kano ico Lesa asosa ukutila Cine. Lelo, “Beni abashininkisha ukuti imembu shenu lyonse shika musanga.” Nga tacakacitike pano, shika musanga pa Bupingushi. Eico muli—muli . . . Shika musanga ku ncende imo, nomba. Ee, mukwai.

¹²⁵ Lelo nga uli mwina Kristu uwa cine, uwaitwa icine cine ngefyo Yona ali, Lesa alilipila kale pa bulendo bwenu. Fumenimo muli ubo uwato ubuleya ku Tarshishi, ifyo fine. Lesa ali mulingile kalibela kuli ubu bumi. Ee, mukwai. Nga uli uwacine, umwana wakwa Lesa uwaitwa, isa kuli Kristu. Isa mu mwisulo Wakwe. Inshila yobe nailipililwa ukufika kwisa? Nailipililwa ukufika ku Nineva, te ku Tarshishi. Mwali lingilwa kalibela. Ubwato bwenu. . . Kuli ubwato ubwalaima nomba line, mu nshila ya buko. Eico kuli ko icintufye cimo icakucita, ninemi muli bwena. Kabili nga mwali kwati ni Lesa, tamwa katale ukukwata umutende . . .

¹²⁶ Kwati mwipwa wandi umunono, akashita akapitapo. Nalimo imyaka ikumi limo nomba, alyenda ukufuma uku na kulya. Ulucelo lumo aya kuli ili chalichi, ili chalichi lya Katolika ilyabela kwisamba kuno, kabili aya kuli ili pamulandu wa fyo taata umo uwa mushilo alanda kuno lubali, kabili umbi *kuno*, na umbi *kuno*. Finshi fyonse ifi fisa mukuba? Mwamona? Kabili nomba acili aleumfwa insala ne cilaka. Natile, “Incende yobe ili pa cipailo palya, we mwana.” Mwamona?

Takwaba inshila iya kufuminamo muli cena. Nga cakutila Lesa alikwitile iwe, kuti cawamafye waipelafye no kutwalilila. Epelafye.

¹²⁷ Ibukisheni, Lesa! Ukuba, Lesa ali mu bwato. Lesa ali mu mabimbi. Lesa ali mucisabi. Konse uko apilibukile, Lesa ali palya.

Mwamona, Lesa epo ali palya, kibili cikatwalilafye ukulakucusha. Eico ni cinshi tulelolela na kibili? Lekeni tutendekefye uku kupuputulwa bwino. Cishinka! Ni cinshi ico imwe mulelolelapo? Twalicetekela ukutila Ukwisa kwakwa Shikulu kuli mupepi, kibili Ali no kukwata Nabwinga, kibili wena Uwaiteyanya. Kibili tatulefwaya ama bwato aya kuya ku Tarshishi ukuli konse. Tuleya ku Nineve. Huh! Tuleya ku Bukata. Ameni. Ico cishinka. Tuleya kuntu Lesa aleya mukutupala, kibili ico eco tulefwaya ukucita.

¹²⁸ Ukwikalala mu Cinso cakwa Lesa, lyena, ne mitima yesu; te maboko yesu, sana sana, lelo imitima yesu kuli Lesa, mpaka Atuwaminisha, ukupitulukamo no kupitulukamo, nga filya, no kubalika kwa bukata Bwakwe; kibili no kubika muli ifwe ubusuma Bwakwe—Bwakwe, no kupisha cilya ico twakwata, mu cintu icituntulu, mwamona, ukufika noko twingangisha bambi ukuti Yesu Kristu wa mweo. Oh, owe! Tulefwaya ukucetekela cilya.

¹²⁹ Kibili ibukisheni, kuntu Yona aile, Lesa ali mu bwato; Lesa ali mu mabimbi; Lesa ali mwisabi. Atwalilile ukubafye na Yona mpaka ubufwayo Bwakwe ubwapwililika bwacitilwe. Ico cishinka.

Kibili nga Alatwalilila uwakukonka imwe, kuti mwabelia *apa*, kibili mwabelia *palya*, lelo mukaba aba cululuka mpaka mukabwele no kutendeka ukucita icintu ico mwatendeke uku Mucitila pa kutendeka. Mwamona? Mwiesha ukuya, ukubutuka ukufuma ku Cinso cakwa Lesa. Ikaleni kuli cena. Mwalicetekela ukutila cena Cishinka, kanshi lekeni... Nga cakutila Cishinka, cintu calinga ukwikalilapo, ukucifwilapo, na fyonse ifyashala. Kibili nga Alitala uku cishininkisha kuli imwe, ukutila cena Cishinka, kanshi tekuti tubutuke ukufuma kuli cena, takuli. Ali nokubapo palya pene, cimo cine fye. Tekuti mucicite.

¹³⁰ Kuli kasesema Wakwe uo apela, ulya umo Alashike ukuya mukati mulya nokubila ilye mbila. Nomba, camoneke kwati nga Ali tumine kasesema umbi, lelo Alashike Yona; kibili nangu ni Eliya nga taciticile; Yeremiya nga taciticile; Mose nga taciticile. Cali ni Yona uwalingile ukuya ku Nineve. Uyofye eka ewalipo kuli cena. Ali musontele no kumweba ukuya. Kibili ilyo Asosa, “Kabiye kulya, Yona, kabiye ku Nineve,” takuli nangu umo uwinka cita cilya kano Yona.

Kibili ilyo Lesa akweba icintu cimo, ulingile ukucicita; te mutntu umbi. Mwamona, tulingile ukuba kuli cena, kibili, nokuya ukucicita.

¹³¹ Twalicetekela ukutila tuleikala mu nshita lintu Lesa alecita icintu cimo. Twalicetekela ukutila tuleikala pakati kabo nomba.

Ndecetekela muno bushiku ndeshimikila kuli lulyo lukuta ulo—ulo ulwaikala, ukulolela kunse ukuti lwingapyafye. Na—Nalicetekela cilya nganshi, no mutima wandi onse. Kuti nasosa ukutila cintu cimo cine nomba ngefyo caleba lyonse.

¹³² Nomba, twalicetekela ukutila inshita naifika ilyo Yohane Washila 14:12 ilingile ukufikilishiwa. Ifwe, twalicetekela ukutila Malaki 4 ilingile ukufikilishiwa. Twalicetekela ukutila Luka 17:30 ilingile ukufikilishiwa. Twalicetekela ukutila, yonse aya ama busesemo ayo Asosele yalingile ukufikilishiwa muli buno bushiku. Twalicetekela yalingile ukufikilishiwa, kabili twalicetekela tuleyamona yalefikilishiwa ino ine nshita. Ico cishinka nganshi.

¹³³ Lekeni ukubutuka. Mwiesha ukufuma mu Cinso Cakwe; endenifye mu Cinso Cakwe. Ico cishinka. Kabili Ninjishiba ukutila ico eco mulefwaya ukucita. Pantu, Nimona ifitupa kunse kulya ukufuma ku Texas, kabili ku Louisiana, kabili na konsefye. Ico eco tubelele pano, te kwesha ukubutuka ukufuma mu Cinso Cakwe, lelo ukubutukila mu Cinso Cakwe.

Bweleleni, fumeni pa . . . [Pali tepu tapali amashiwi—Kale]. . . nga wali Yona, nga walesunguka ni nshila nshi wingayako nangu ifyo winga cita, isa kuno, nina mu bwato pamo naifwe muno bushiku. Tuleya kulya ku Tarshishi, ukuya bilikisha . . . nangu, Nineve, ukuya bilikisha. Tulebuleka bulyo bwato bwa ku Tarshishi ukutwalilila ukuya kulya nga balefwaya. Natukwata umulimo kuli Lesa, neyo, ni Mbila iyo twakwatilako umulimo.

¹³⁴ Eico muli uyu mulungu uleisa, icakubalilapofye icinono muno bushiku, kuku mwishibisha. Ilyo Ndebelikisha, Nabafye uwakwata umulimo pa Mbila, ba munyina. Imwe mwe bakashimikila mwebekele pano, Nshili pano ukumulenga ukumfwo bubi. Kabili imwe mwe banakashi na baume, pali uyu mulandu wa cupo no kulekena uleisa, Ndefwaya imwe ukwibukisha muno bushiku. Ninsosa fyonsé ifi fintu, ukuleta ici kuli imwe, ukutila Nakwatafyé umulimo kuli Lesa.

Elyo kabili, nakabili, Ndi uwa mulimo kuli imwe, ku kumweba Icine. Kabili Nshamwebe icintu cimbi kanofye Icine, ilyo lyonse Lesa alenjishibisha ifyo Icine caba. Mpaka Naishiba Icine, Nshasosepo nangu cimo pali cena, mwamona, Nshasosepo nangu cimo pali cena. Lelo Ndecetekela ukutila Lesa anangishe Icine pa *Cupo No Kulekena*, kabili Ndesubila ukutila Ali nokunenga ukuileta pa mbilibili.

¹³⁵ Kabili ne Mbila shimbi isho Ndefwaya ukukwata uno mulungu, ni, *Nani Uyu Melkisedeki? Nikwisa Uko Lesa Asalile Ukubika Ishina Lyakwe?* Kabili ne fintu ifinono ifya pala nga filya, ishili ni Mbila ishileisa, no *Ubukali bwa Pakupapa*. Kabili—kabili ne fintu ifinono, muli—mul iyo imitantikile, kabili ku kupalanaya ngo *Mwaume Ulesala Umukashi Wakwe*. Kabili ne

fintu ifinono, shilye Mbila, Ndefwaya ukushileta uno mulungu. Lelo Ndefwayafye ulukuta . . .

¹³⁶ Nikwisa, nga muliko kashimikila muno; Nshili pano, ba munyinane . . . Nshilefwaya imwe, nangu imwe bambo ba membala, ukuya ku chalichi yenu, nokuya sosa, “Munyina Branham atile *ifi ne fi*.¹³⁷

Nalikwato mulimo ku Mbila iyo iyapelwa kuli ine ukufuma kuli Lesa Uwapulamo. Ilyo Njiminine pano muno bushiku, kabilis Lesa aliishiba ukutila cishinka, ukutila palya pene pali uyu mumana . . . Kuli abantu, nalimo, abekele muno, lintu ulya Malaika wakwa Shikulu aishile kulya kwine no kunjeba ifyo Acitile, palya pene mu 1933, umu mwine muli uyu musebo uwitwa Spring Street kuno. Nga muli abeni kuno, mukenshefye mulya. Ni pa cifutu ca musebo wa Spring Street, palya epo mukumanya umumana, kabilis palya epo cacitike. Ico cali ni mu 1933. Limbi kuti caba imyaka amakumi yatatu na ibili iyapitapo, kanshi. Oh, caba amakumi yatatu- . . . caba amakumi yatatu- . . . imyaka amakumi yatatu naibili iyapitapo.

Kabili ica kutila ifyo Aleta cilya ukufika ne lelo, fyonsefye. Kabili twaliya mu ncende shimbi, ukutwala i Mbila, kabilis twalimona abalwele ukuposhiwa, impofu, kabilis na balemana, na balemana amolu, nefite, na fyonsefye. Elyo kabili nokumona na bafwa, abo twaishiba abo calembelwepo, ukubushiwa ku bafwa. Abantu balafwa, kabilis balabushiwa nakabili ku bumi, kabilis ne fintu fyonse ifi. Nga cakutila i Mbila yabilwa, kulabako ifishibilo ne fipapusho!

¹³⁷ Kabili mucili mulemona itontonkanyo limo line lilya isambilisho ilyakale ilyo mwaisa nalyo? Ilyo ilishafumine kuli Lesa. Lesa tekuti acitefye . . .

Lesa aleesha ukuleta amano yenu ukutemunwa ku Cintu cimo.

¹³⁸ Elyo kabili lintu Yesu atendeke ukulashimikila, Atendeke ukundapa abalwele, no kulacita imilimo iikalamba ne fintu. Ena, lyonse, Ena . . . Yesu ali cicitile. Kabili Mose na Yesu bali cicitile, kabilis na bonse abashala. Kabili lintu Ali pano, Ali cicitile.

Kabili Alecicita, icintu cimo cine ileelo. Nga Alenga kwaba ukulongana nga filya, ukupuputulwa, nokutendeka ukulongana mwisonde, kabilis kulesa mukumokela ne fi fishibilo ifikalamba ne fipapusho. Elyo kabili mulesa mukumona, ukubwekela, ilya line isambililo lya kale limo line, kulabako—kulabako icintu cimo icalubana kulya pa cifulo cimo. Kuliko icintu icipya icileletwa! Lintu Yesu aishile monekela, panuma, lintu . . .

¹³⁹ “Ena ni rabbi umusuma.” Kuti Aya ku cintamba icili conse no kushimikila, ilyo Aleposha abalwele. Ilyo, oh, baletemwa ukumukwata Ena kulya bali.

Lelo ubushiku bumo ilyo Aikele pansi, no kutila, "Ine na Taata Wandi twaba Umo," munyina, Tali uwalumbukwa panuma yacilya. Ilyo Atile, "Kanofye mwalya umubili Wandi, no kunwa u Mulopa Wandi, tamukwete u Mweo muli imwe. Lelo uyo uulya umubili Wandi, no kunwa u Mulopa Wandi, nakwata u Mweo uwa muyayaya; kibili Nka mubusha mu bushiku bwa kulekelesha." Lyena, Tali uwalumbukwa ukutula lilya.

¹⁴⁰ Batile, "Uyu Muntu ni mulya bantu. Uyu Muntu ni Beelzebuli. Enshila Acitilamo filya fintu. Kuti Alanda pa fyaleisa mukucitika. Aloleshe mukati ka mano ya—yabo no kulingulula amatontonkanyo yabo. Aba ni kabuka."

Lelo, fintu cali, Ali—Ali i Cebo cakwa Lesa ukulangishiwa pali ilya inshita. Kibili Ali uwakubomba incito. Atile, "Ndacita lyonse ico icaba icakusekesha kuli Taata Wandi." Lesa atwafwe ukucita icintu cimo cine, ukucita cilya icilesekesha kuli Taata.

¹⁴¹ Kibili Ndesubila imwe bonse muli no kuumfwa. Nga tamulesuminishanya na ine pali ishi i Mbila ne fintu, ukutila mulingile ukwibukisha, kwena kwatenikofye uyu mucinshi, ukuti Ninkwata umulimo, kibili Nshileya ku Tarshishi. Ndi munshila iyakuya ku Nineva, kibili Ni—Ningile ukubila. Shikulu amupale bonse.

Katukontamiike imitwe yesu nomba pa kashitafye.

¹⁴² Ilifye mupepi no kukwana naini-sate. Nshilefwaya ukumuteka, lelo Ndefwaya ukusanga ici nga kuti Nacita, muno bushiku. Bushe muliko bamo muno abo—abo abashaba muli Kristu ngefyo balingile ukuba, lelo kuti mwa—mwafwaya ukubamo, kibili mulekabila ukubamo, bushe kuti mwaimya fye ukuboko kwenu, no kusosa, "Munyina Branham, mpepelako"? Lesa amupale, loleshenifye amaboko. "Nde—Ndefwaya... Ndi pano, Munyina Branham, ukupalama sana kuli Lesa."

Kabili nga namwimya umutwe wenu, ukuboko kwa—kwandi kuli pa mulu, pamo. Ici eco Mbelele pano. Ndi nensala, nga fintu imwe muli.

¹⁴³ Lelo, oh, ubushiku bumbi, icintu cimo icawamisha nganshi calicitike, kibili Ni—Ninjishiba nomba ifyakucita. Kibili Nde—Ndepepa ukutila Lesa alamupela kulya ukumfwikisha ukwapwililika. Epo kuli. U... Nga kuli ilipusho mu mano yenu, kulingile kwabako ubwasuko ku cifulo cimo, ku kwasuka kuli lilye lipusho. Ipepo lyandi, lyakutila, Lesa amupele ukumona lilye lipusho ukwasukwa mukati ka ino nshita.

¹⁴⁴ Nga na mulwala, Lesa enga muposha. Tuli no kukwata ukulongana kwa kuposha, Ndemonia, mucituntulu cila nshita ya bushiku, kibili tuli no kupepelela abalwele. Tuli nokucita icili conse ico twinka cita ku kumwafwilisha, kibili naimwe mucite icili conse ico mwinka cita ku kutwafwilisha. Kibili tuli no kubombela capamo, ukucetekela ukutila Lesa ali no kutupela ukulongana ukukalamba.

¹⁴⁵ Nomba, Taata Lesa, aya mashiwi ayanono ayashasuntinkana, lelo yali mu maboko Yenu nomba. Shikulu, yena nayalandwa. Ningile ukuyakumanya. Kwatifye... Yalya amashiwi tekuti yafwe; yaleya ukulashinguluka no kulashinguluka isonde, ukusungwa, kabilo ubushiku bumo Nkesa yomfwa umuku naumbi nakabili. Ninjishiba ici, Shikulu, kabilo Ndecisosha no bufuma cumi bonse.

¹⁴⁶ Ndepepa, mwe Lesa, muno bushiku, pali umo umo muli aba, abana Benu. Kabilo, O mwe Lesa, Ndecetekela, lintu umulungu taulapwa, bali—bali no kuumfwa; ukutila ilipusho, ilyo ilyaba ilikalamba nganshi mu mano yabo muno bushiku, lili no kupwishiwa. Cipeleni, Shikulu.

¹⁴⁷ Kuliko bamo muno abashamwisha Imwe, Taata, nga Kapususha, na nomba, nangu limbi tabatala ukwisushiwa na Mupashi wa Mushilo. Lekeni ino ibe ilye nshita ya bushiku.

¹⁴⁸ Shikulu, tekuti Njisushe umuntu nangu umo na Mupashi wa Mushilo; nangu kuti Napususha uuli onse. Kuti Nabebafye ifyo Mwasosele, “Balishuka abo bakwata insala ne cilaka ca bulungami, pantu bakesushiwa.” Kabilo Ndepepa, mwe Lesa, ukutila Mwalalenga insala iyaibela mu mitima yabo.

Abengi, Shikulu, balingile ukuba ne nsala; kuti baenda shani ne myotoka aya ma mailoshi imyanda, ukupita mumenshi makasa na fyonsefyre, kabilo mulya mu mpili umulokele, kabilo ukuciluka amatololo, ku kwisa ku ka ncende akanono akaba pano pa cifutu! Elyo na kabilo Ndetontonkanya, Mwatile, “Ukuli Inama iipaiwe, bakapumpe bali no kulongana.” Tulisheni, Shikulu, pali Manna Wenu uwa Bulesa. Peleni ku myeo yesu cilya ico tulekabila nganshi. Tuli necilaka pali Imwe, Taata. Tuli mu maboko Yenu nomba.

¹⁴⁹ Lekeni u Mupashi wa Mushilo uukalamba uyo uwaikile pa lupili ubushiku bumbi pa mulu palya, Ndepepa ukutila Ala afwilisha umutima onse muno no busuma Bwakwe no luse, no kwiluka. Tulemona, Taata, ico eco tulekabila, kukwata ukwiluka. Pantu nga tatwishihe ico tulecita, lyena musangoshi twingeshibilamo ifyo twinga cicita? Lelo tulingile ukukwata ukwiluka. Nge fyo Daniele asosele, aishile “mukwiluka ku Fyalembwa na kasesema Yeremiya.” Kabilo, Taata, twalikwata ukwiluka ku Fyalembwa na Mupashi wa Mushilo, nge fyo Ali noku Fisokolwela kuli ifwe muli ino ora. Peni kuli ifwe, Shikulu, ukukabila uko twakwatila Imwe. Mu bufuke tulelomba ici, Taata, ku bukata Bwenu, mwi Shina lyakwa Yesu Kristu.

¹⁵⁰ Nomba ne mitwe yesu iya kontamikwa. Ilyo nkashi yesu alelisha, lulya, “Ali no kumpela inkumbu no bukata, no kuya naine mu bulendo bonse.” Ndefwaya imwe ukupepafye umutalalilwa nomba no kwipusha Taata wa mu Myuulu ukutila Alapela kuli imwe, muno bushiku, cilya ico mulekabila.

¹⁵¹ Munyina umutemwikwa, nkashi umutemwikwa, Alifye mupepi ngefyo ukuboko kwenu kuli kuli imwe. Imwe, mwaliincetekela mu—mu fintu fimbi, ncetekeleni muli ici. Ali pano ku ku mupela conse ico mulekabila.

¹⁵² Oh, pa milungu iyapita Nali ne nsala sana, ne cilaka sana, ukufuluka sana ku mwesu, ku kwisa mukumumona imwe. Uyo e mulandu Nasosele ukutila, “Billy, natuleya ku mwesu.”

Meda atile, “Cinshi ulefwaila ukubwekela kulya, muli cilye calo icatalala na kibili, Bill? Lyonse ulakwata ifilonda pa mukoshi na fyonsefye. Lyonse nga waisa, na ulwala icifine, kibili ne shiwi nalikoma, kibili tekuti ulande na bwino.”

¹⁵³ Natile, “Ukuba, Nshaishiba.” Natile kuli ena... Ndemona umunandi, Charlie Cox, uyo wikele kunuma kulya. Natile, “Ndi uwakabila nganshi ku kuumfwa Charlie ukusosa, ‘Kalya kapale akanono kaninine cilye cimuti pa mulu palya.’ Ndakabila sana ukucumfwa cilya.” Nde—Ndefwayafye uku—ukufwaya ukuba mupepi naimwe.

¹⁵⁴ Ninjishiba Munyina Banks alilwele sana. Kibili Nalimwene icimonwa ca pali ena, kuno tekale sana, kibili alilele nasenama. Kibili Naliishiba kwashalefye panono ukutusha ifwe, nombaline. Nga Nalolekesha kuli imwe mwe bapusana pusana...

¹⁵⁵ Nalingilemo inshita imo iya bushiku, ku musonkano wa ba Shimakwebo abena Kristu, kibili ukusangwa monse mufyalo. Umukote “Pop” Shakarian, wishi wakwa Demos, aleikalafye mulya no kutwalilila ukulalolekesha mpaka Naissa ingila, lyena alemwentula, kibili kulyo kusokonesha ukunono ena alesokonesha kuli ine. Talimo mulya. Aliya.

Elyo Nalingile ukwisa kuli lulyo lupwa, na EFYA SOSA SHIKULU, umwana wabo umwanakashi ali no kufwa, pamo. Florence, Nalimumwene mu cimonwa, nalimumwene ukuya. Kibili Ninjishiba ali no kuya. Kibili Natile, “Pepeyi, mupepe fye. Namwishiba kwaliko... Kasesema inshita imo bali mwebele ukuya eba imfumu ukuwamye ng’anda yaiko. Kibili alipepele kibili Ena alengele ubumi bwakwe ukutwalilila, pa myaka ikumi limo na isano.” Natile, “Mupepe.”

¹⁵⁶ Lelo, mulolekeshe, kibili Na—Nalibwele... Naliikele mulya mu restaurant, ubushiku bumbi, ndelya. Umwaume aishile kuli ine, atile, “Bushe te iwe Billy Branham?”

Natile “Ee.”

¹⁵⁷ Limbi ena tanjishibe ine, pantu *ici* apa apabela ipala pa mutwe wandi. Nalifwele aka kasote akanono aka mushishi, uku nga fwilisha ukukana kwata ifilonda ifya pa mukoshi mushita iyi iyakulongana.

Kibili aishile kuli ine, atile, “Nacitontonkanya ukutila Nali kwishiba, Billy.”

Natile, "Ee." Natile, "Niwe ani?"

Atile, "Nine John Warman."

Natile, "Nga Zip alishani?"

Atile, "Billy, alifwa." Uh!

¹⁵⁸ Naleya ndepita mu cikulwa ca milandu; naile mukulipila imisonko yandi. Ukulafuma mulya mu cikulwa ca milandu, kabiili umwanakashi alimbilikishe, kabiili atile, "Bushe walishiba ukuti Yohane aliya?" Nangu, ishina limo. Limbi talyali ni Yohane; Ed, nangu ishina limbi. Kabiili Natile... Nshamwishiibe umwanakashi. Nalyumfwile insoni. Kabiili ukwisasanga, Nshaishibi ue ali ena.

Atile, "Bushe uleibukisha inshita imo iya bushiku ubwabipisha lintu umumana waiswile na mululamba kuno lubali, kabiili na mayanda yalesendwa, kulya ku Musebo wa Chestnut, kabiili tawasakamene ubumi bobe ku kuya mu ncende ya musango ulya no kuyasenda umwanakashi na bana bambo abanono ukubafumyamo?"

Natile, "Bushe niwe?"

¹⁵⁹ Atile, "Ni—Nine ulyo mwanakashi." Atendeke ukulalilila akanya kakwe; mwaliishiba ilyashi lyandi. Atile, "Ulya ue Natile 'akanya kandi,' aliupwa kabiili alikwata ulupwa." Mwamona? Kabiili yuu ali pano, umukote kabiili nemfwi; kabiili ine Ndi pano, pamo.

¹⁶⁰ Umo na umo, amakadi yesu yalafumishiwa pa lwino, ngefyo cali. Kabiili twalikwata ukulongana, kabiili Ndaluuya *uyu* umo, ukulufya *ulya* umbi. Bonse tulingile ukwisa luba, ubushiku bumo muli ishi nshiku.

Lelo, munyina, nkashi, kwalibako Incende iya kulonganinako. Lekeni tube abashininkisha nomba ukutila tuli abalungama. Bushe mwalacita? Mwileka ukwiluka kwesu konse pali Lesa, na fimbipo, ukonaika. Lekeni tucetekele.

¹⁶¹ Taata, bali mu maboko Yenu. Ndi mu maboko Yenu, Shikulu. Tulifye muno mukulashikwa nomba, ku kuiteyanya pa kulonganu ukuleisa uku katendeka mailo munshita ya bushiku. Shi Mwinga twafwilisha, Shikulu? Lekeni ukwesulekeni ilyashi lyesu lileba lyonse pali Imwe! Lekeni imitima yesu na mano yesu ye kale pali Imwe, kabiili Mwatille Muli no kutusunga mu mutende uwapwilika. Kabiili cali lembwa muli Baibebe, "Mwishintilila ku kwiluka kwenu mwebene." O mwe Lesa, tatulefwaya ukwiluka kwesu; tulefwaya ukwiluka Kwenu. Kupeleni kuli ifwe, O mwe Lesa. Kabiili lekeni ukupuputulwa kwise mu myeo yesu mpaka ili bumba lya bantu likabe fye umutima umo no kuba capamo. Cipeleni, Taata. Peleni ifi fintu, lintu tulepepa mwi Shina lyakwa Yesu Kristu.

Mpaka umweo wandi uwasumbulwa ukasange
Ukutusha kwi shilya lyamumana.

Pa capindama, pa capindama,
Pabe ukusumbulwa kwandi . . .

Lekeni twimye amaboko yenu.

. . . pe;
Mpaka umweo wandi uwasumbulwa ukasange
Ukutusha kwi shilya lyamumana.

Yesu, munsunge pa capindama,
Kwaliba Akafukauka akasuma,
Akabula umutengo kuli . . . (Ee, Shikulu,
akabula umutengo.) . . . umulonga
wabundapishi,
Upongoloka ukufuma ku Kafukauka kaku
Kalbale.

Pa capindama, pa capindama,
Pabe ukusumbulwa kwandi pe;
Mpaka umweo wandi uwasumbulwa ukasange
Ukutusha kwi shilya lyamumana.

¹⁶² [Munyina Branham atendeka ukungw'ingw'inta *Mupepi Ne Capindama*—Kale.] O mwe Lesa! Nga kuliko umo muli imwe uuleumfwa ngo kwisa kuno no kufukama pansi ukushinguluka icipailo, nga mulefwaya fye ukwisa, soseni, “Nshili apo Ningile ukuba, Shikulu. Nde—Ndefwaya uku isangulula cipyia cipyia. Ndefwaya ukucicita muno bushiku, Shikulu.” Muli abasengelwa ukwisa. Twalaba pano ukupepa naimwe.

Pa capindama, pa capindama,
Oh, pabe ukusumbulwa kwandi pe;
Mpaka umweo wandi uwasumbulwa ukasange
Ukutusha kwi shilya lyamumana.

Yesu, nsungeni mupepi necapindama,
Kwaliba Akafukauka akasuma,
Akabula umutengo kuli bonse, umulonga
wabundapishi,
Upongoloka ukufuma ku Kafukauka kaku
Kalbale.

Pa capindama, pa capindama,
Pabe ukusumbulwa kwandi pe;
Mpaka umweo wandi uwasumbulwa ukasange
Ukutusha kwi shilya lyamumana.

¹⁶³ Katupepefye, cila umo mu nshila yenufye nomba. Labenikofye—fye ku nshita. Katukontamikefye imitwe yesu mu Kubapo Kwakwe. Uyu mukashana umunono pano, alelila, “Nali Kutemwa, Yesu!” Muleibukisha lintu mwa pusushiwe, imyaka iingi iyapitapo, muleibukisha ifyo cilya cali icawama kuli imwe? Ali fye uwawama filya fine muno bushiku. Katupepe, bonse mu nshila yenu nomba. Lekenifye—lekenifye tuisangulule kuli Lesa, ukuilashikafye fwebene kuli Shikulu.

¹⁶⁴ Mwebasuma Shikulu Yesu...[Pali tepu tapali amashiwi—Kale.]

Akamana ka kutalalika kwandi konse,
 Ukucila pa mweo kuli ine,
 Nani umbi Nakwata pesonde ukufumyako
 Imwe?
 Nangu nani mu Muulu lelo Imwe?

Mwe Lesa, tulepepa nomba ukuti uluse Lwenu ne nkumbu fyalatumwa pali cila umo umo muli ifwe, Shikulu. Tuli pano ukushinguluka icipailo. Abengi tekuti bese; Muli no kubakumanya pa pipuna fyabo. Conse ico tulepela, Shikulu, Muli abaipelesha uku cipokelela. Nga kuti twa Mupelafye inshita yesu, Muli no kuipokelela; italanta, Muli no kulipokelela. Lelo, Shikulu Lesa, ino inshita ya bushiku tuleya ukucila pali cilya, tulepela fyonse fintu twaba. Fyonse fintu Naba, fyonse ifyo Nsubila ukuba, fyonse fyaba muli Imwe, Shikulu. Tulepepa ukuti Mwalasenda aya, amapepo yesu, mukati ka mutima Wenu, Shikulu, kibili tupeni ukushika ukukalamba ukwa Mupashi wa Mushilo, ukuti ubumi bwesu bukapilibulwe. Pantu, tulemona ukutila tuli mupepi na kumpela nomba. Tekuti pabe ukukokola na kibili. Kibili ilyo tulemona abatemwikwa besu ukulaya, ubushiku no bushiku, abaice na bakalamba, natwishiba ukutila nomba line ilingile uku konkossa pa fiibi fyesu. Kibili muno bushiku, Shikulu, lantu tucili mu mano yesu aya tuntulu, natwikalala muno, nangu ukufukama muno, ukwiminina muno, umusango uuli onse tubelelemo, tupokeleleni, Shikulu Lesa.

¹⁶⁵ Nsendeni, Shikulu. Nshili nangu cimo, lelo fyonse fintu Ndi, Shikulu, nga kuti Mwakwatamo cimo icakubomfyia muli ine, Ndeilashika ne mwine kuli Imwe.

¹⁶⁶ Napapelako, mwe Lesa, cila umo uwa aba. Aba bantu abatemwikwa abo Naiminineko kulya mu mpili mu Arizona no kuba lililako, kibili pano nabafukama ukushinguluka pamo na ifwe muno bushiku, ukupepa, ukusangulula ubumi bwesu. Twali Mutemwa, Taata, ukucila ubumi bwesu fwebene. Twali Mutemwa ukucila indupwa shesu. Twali Mutemwa ukucila abakashii besu, abana, tata, mayo, nkashi, munyina, umulume, umukashi. Twali Mutemwa, Shikulu Yesu. Lengeni cilya ukuba icitintulu sana mu mitima yesu, Shikulu. Itilenimo amafuta aya kusekelela, uno mulungu, Shikulu, mu myeo yesu. Mutusambe, ukusambwa ne Cebo, ku menshi ya Cebo, ukwakanya kuli ifwe Icine.

¹⁶⁷ Abengi muno bushiku, Shikulu, kibili bali no kuba kuno, abo abafulunganishiwa pali aya masambililo ayaba ayakankala nganshi. O mwe Lesa, isuleni kalya kafukauka mu ng'anda yakwa Lesa, akabelako—akabelako ukutuwamya. Ndepepa, Lesa, ukutila Mwala tusamba no kutusangulula mu Mulopa Wenu, no kutulenga ifibumbwa fipy. Kibili tupeleni inkumbu

na maka, ku kuleta i Cebo ca Cine mu busokololo bwa Ciko bwa Bulesa ubwa Buntu bwakwa Yesu Kristu.

Lekeni Amonekele kuli ifwe, Shikulu. Lekeni Ese no kuposha amalwele yesu, no kutulekelela imembu shesu, isusheni imitima yesu iyansala ne fintu ifisuma ifya nsansa ishikalamba, i Mbila nsuma ukulangishiwa mu bumi bwesu.

Paaleni pastor onse, kembisha wa nyimbo onse, na kasambilisha onse uwa Sunday sukulu. Tupaleni bonse, capamo, Shikulu, pantu mucine cine twali Mutemwa. Kibili nomba tuli Abenu, Shikulu, muli uku kulashikwa. Mwi Shina lyakwa Yesu Kristu, tubomfyeni nomba ukulingana no bufwayo Bwenu Mwebene.

Icicetekelo candi cilolesha kuli Imwe,
 Mwe Mwana wa mpaanga yapa Kalbale,
 O Kapususha wa Bulesa;
 Nomba mung'umfwe ilyo Ndepepa,
 Sendeni shonse imembu shandi
 ukushifumyapo,
 O lekeni ine ukufuma ileelo
 Mbe umupwilapo Uwenu!

Mwalitemwa ico? Katwimbe na kibili.

Ilyo Nyenda mu mfifi ya mweo,
 Nobulanda bwanshiguluka ine,
 Oh, Mube Katungulula wandi;
 Ukulenga imfifi ukusanguka akasuba,
 Mufumyepo ifilamba fya kucula,
 Kibili lekeni niye iciyeyeye
 Ukufuma kuli Imwe.

Bushe ico cilemulenga ukumfwa bwino? Nibanga abatemwa ukwimba shilye nyimbo shakale? Nalishitemwafaye. Bushe imwe tamwashitemwa?

Oh, tuleya ku Sioni,
 Iisuma, iisuma Sioni;
 Tuleya kumulu ku Sioni,
 Ulya Umusumba uusuma uwakwa Lesa.
 Oh, tuleya ku Sioni,
 Oh, iisuma, iisuma Sioni;
 Tuleya kumulu ku Sioni,
 Ulya Umusumba uusuma uwakwa Lesa.

Iseni, ifwe fwebatemu Shikulu,
 Nokuleka insansa shesu shishibikwe,
 Tuibimbe mu lwimbo no kwampaana ukusuma,
 Tuibimbe mu lwimbo no kwampaana ukusuma,
 Kibili ifyo fine tushinguluke Icipuna ca
 bufumu,
 Kibili ifyofine tushinguluke . . .

Nomba, katwiminine nomba ilyo tulelwimba. Poshanyeni umo no munankwe.

. . . tuleya ku Sioni,

Akupale, nkashi! Akupale, nkashi! Akupale, munyina! Akupale, nkashi!

Ulya Umusumba uusuma uwakwa Lesa.

Katwimye amaboko yesu nomba kuli Lesa.

Oh, tuleya ku Sioni,
Iisuma, iisuma Sioni;
Tuleya kumulu ku Sioni,
Ulya Umusumba uusuma uwakwa Lesa.

Oh, tuleya ku Sioni,
Oh, iisuma, iisuma Sioni;
Tuleya kumulu ku Sioni,
Ulya Umusumba uusuma uwakwa Lesa.

Bushe ico tacilemulenga imwe ukumfwa bwino? Owe, owe!
Oh, lekenifye twimye amaboko yesu noku Mulumbanyakafye mu nshila yesufwe bene.

¹⁶⁸ Shikulu Yesu, Imwe mwe Luba lya mu Sharon, Cananika uwamu Mupoka poka, Ulutanda ulwa Buta kibili ulwa Lucelo, Uwawamisha pa makana ikumi ku mweo wandi. Imwe mwe Kamulonga ka busuma bwandi bonse, ukucila ubumi kuli ine! Ifyo twa Mutemwa! Tumfweni, O mwe Shikulu. Ifyo tule Mitotela! Oh! [Pali tepu tapali amashiwi—Kale.] Ifyo tule Mulumbanya! Paleni aba, Shikulu Wesu uwawamisha kibili Kapususha! Peleni ifi fintu, Shikulu. Fipeleni . . . ? . . .

. . . mupepi necapindama,
Pabe ukusumbulwa kwandi pe;
Mpaka umweo wandi uwasumbulwa ukasange
Ukutusha kwishilya lyamumana.

¹⁶⁹ Munshila imo, naimbi, Ndeumfwa fye tuleya . . . Kuliko icintu cimo icilifye ku ntanshi yesu. Nomba, ibukishenifye, Ndecetekela Ndesesema. Insansa ishikalamba shili kuntanshi. Cicetekeleni. Ico cishinka. Imitima iangi iyabulanda ikalengwa . . . Inkama ishikalamba shikaletwa pa mbilibili, kibili abantu abali no bulanda bakalengwa ukusansamuka.

Mupepi necapinda, pa capindama,
Pabe ukusumbulwa kwandi pe;
Mpaka umweo wandi uwasumbulwa ukasange
Ukutusha kwishilya lya mumana.

¹⁷⁰ Nga Yohane uwakale, lintu aishileba umukote nganshi ku kushimikila, kuti aikalafye no kupunda, efyo banjebele, na maka yakwe yonse, “Mwe bana abanono, muletewana umo no munankwe!” Muletewana umo no munankwe. Mwileka nangu cimo ciise pakati kenu, mwamona. Talusheni fyonse,

ifintu fyonse kuli . . . Ee, te mulandu fintu cili, lolekeshenipo pali cena. Tuli mu bulendo bwaku Nineve. Mwamona? Mwiya muli bulya bwato ubwakale bwa ku Tarshishi, bulya bulemufumya mwi bumba. Lekeni twende ukuyafye mu ka mulonga ka mapalo yakwa Lesa. Ndecetekela tuli no kuya kwata. Ndecetekela Shifwe.

¹⁷¹ Ndeumfwa bwino nomba, nkashi? Ico cisuma. Filya efyo Mfwaya ukumona abana ukufyalwa, kulyo ukwingilamo.

Kuti natontonkanyafye imyaka iyapita, pali shino shine i mansa, niyanga amakana ubwingi abo abafyalwa mukati ka Bufumu bwakwa Lesa, pano pene pali uyu mushili. Tatwaishibe sana, lintu twaiminine pano na ma cents amakumi cine konse konse mwi tumba lyesu, ukukulilako ulukuta! Oh, Atile, “Ine ne Yehoba ni nci byalika; Nka citapilisha akasuba no bushiku.” Kabili Ali cicita. Ali cicita.

Lesa amupale. Nomba lintu twalakontamika imitwe yesu . . .

¹⁷² Nomba, mailo mu bushiku, ibukisheni, ukulongana kukabela pa cikulwa capa sukulu kuno. Kabili nga . . . Tuli no kutumako umo kulya nomba, ku kulangisha abantu ifya kufika kulya, pantu abappya bakesako.

¹⁷³ Mwali Mutemwa, soseni, “Ameni.” [Ulukuta lwatila, “Ameni.”—Kale.] Oh, bushe Tawama?

¹⁷⁴ Naliiminine kulya ku lulamba lwa mumana, nokwimba lulyo lwimbo ulwakale:

Kululamba lwa Yordan wamabimbi
Naiminina,

Tontonkanyeni, ici cili imyaka amakumi yatatu iyapitapo, amakumi yatatu na-itatu iyapitapo.

Nokutonte linso lye subilo,
Ku Mpanga ya Kenani iyawama kabilo
iyabuseko,
Ukwaba ifikwatwa fyandi.

Kabili abengi Nabatishe, cilya cungulo bushiku, bali kulya lubali nomba. Lintu, baiminine palya no kumona lulyo Lutanda lwa Lucelo luleika ukufuma mu myulu, ukulashinguluka ngefi, atile, “Ngefyo Yohane Kabatisha atuminwe ku kuleta, ku kutangilila ukwisa kwa ntanshi ukwakwa Kristu, i Mbila yobe ikatangilila Ukwisa kwa cibili.” Kuti ca tontonkanishiwa shani? Lelo, Ifyebo fyonse ifya kwa Lesa fya cine, Ifyebo fyonse ifya kwa Lesa. Tuleikala mu Cinsa ca ilye Mfumu ikalamba. Lesa amupaaale.

¹⁷⁵ Ilyo tulekontamika imitwe yesu, Nalaipusha Munyina Neville, pastor wesu umusuma, ukwisa kuno nokwisa tusalanganya mwipepo.

Lesa akupale, Munyina Neville.



UMUNTU UKUBUTUKA UKUFUMA KU CINSO CAKWA SHIKULU BEM65-0217
(A Man Running From The Presence Of The Lord)

Iyi Mbila na Munyina William Marrion Branham yaletelwe intendekelo mu Cingeleshi pali Citatu mu cungulo bushiku, Kabengele kakalamba 17, 1965, pa Branham Tabernacle mu Jeffersonville, Indiana, U.S.A., yafumishiwa muli tape iyambulwa kibili nalilembwa ukwabulo ukulundamo mu Cingeleshi. Uku ukwilula kwa mu Cibemba kwa lembelwe no kupelwa na ba Voice Of God Recordings.

BEMBA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Icishibisho ukufuma ku mwine kalemba

Insambu shonse tashisuminishiwe. Ili buku kuti ly a lembwa pali pulinta yapa ng'anda ku kubomfy a kwa muntu pa lwakwe nangu ukupela, ukwabula amalipilo, nge cipe caku sabankanya Imbila nsuma iya kwa Yesu Kristu. Ili buku tekuti lishitishiwe, ukulembululwamo ayengi, ukubikwa pa mwela, ukusungila muli ba mashini, ukwalula mu ndimi shimbi, nangu ukuli bomfy a ku kulomba indalam a ukwabula insambu shalembwa na ba Voice Of God Recordings®.

Nga mulefwaya ukwishesibilapo nafimbi nangu ukufwaya na fimb iifyabapo, twalomba tumeni kuli ba:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org